


明史葉

傳百五十三之六



內閣文庫	
番號	漢 8835
冊數	78 (66)
函號	281 39



明史藁

列傳第一百五十三

光祿大夫 經筵講官明史總裁口部尚書加七級臣王鴻緒奉

敕編撰

金聲

丘祖德

溫璜

吳應箕

侯峒曾

沈猶龍

侯承祖


陳子龍

夏允彝

楊文聰

金聲字正希休寧人好學工舉子業名傾一時崇禎元年成進士授庶吉士明年十一月

大清兵逼都城聲慷慨乞面陳急務帝即召對平臺退具疏言臣書生素矢忠義遭遇聖明日夜為陛下憂念天下事今



兵逼京畿不得不急爲君父用夫通州昌平都城左右翼宜
戍以重兵而天津漕艘所聚尤宜亟防今天下草澤之雄欲
效用國家者不少在破格用之耳臣所知申甫有將才臣願
仗聖天子威靈與練敢戰士爲國家捍強敵惟陛下立賜裁
許申甫者僧也好談兵方私製戰車火器帝納聲言取其車
入覽授都司僉書卽日召見奏對稱旨超擢副總兵敕募新
軍便宜從事改聲御史參其軍甫倉猝募數千人皆市井游
手所需軍裝戎器又不時給而是時

大清兵在郊圻久勢當速戰急出營柳林總理滿桂節制諸
軍甫不肯爲下桂卒掠民間甫軍捕之桂輒索去聲以兩軍
不和聞帝卽命聲調護亡何桂歿甫連敗於柳林大井乃結

車營盧溝橋

大清兵遶出其後御車者惶懼不能轉殲戮殆盡甫亦陣亡
聲痛傷之言甫受事日淺直前衝鋒遺骸矢刃殆徧非喋血
力戰不至此帝亦傷之命予恤典聲恥無功請率參將董大
勝兵七百人甫遺將古璧兵百人及豪傑義從數百人練成
一旅爲劉之綸奇兵收桑榆之效不許俄以清核軍需告竣
奏繳關防請按律定罪再疏請罷斥皆不許東江白毛文龍
被殺兵力弱勢孤聲因東宮册立自請頒詔朝鮮俾聯絡東
江張海外形勢帝雖嘉其意亦不果用尋上疏言陛下曉夜
焦勞日親天下之事實未嘗日習天下之人必使天下才不
才及才長短一一程量不爽方可斟酌位置往者陛下數召

對羣臣問無所得鮮當聖心遂厭薄之臣愚妄謂陛下泰交
尚未殷顧問尚未數不得謂召對無益也願自今間日御文
華令京卿翰林臺諫及中行評博等官輪番入直博諮廣詢
而內外有職業者亦得不時進見政事得失軍民利病廟堂
舉錯邊塞情形皆與臣工考究於燕閒之間歲月既久品量
畢呈諸臣才不才及才長短豈得逃聖鑒帝未及報聲再疏
懇言之終不用遂屢疏乞歸後大學士徐光啓薦聲同修曆
書辭不就以御史召亦不赴八年春起山東僉事復兩疏力
辭鄉郡多盜聲團練義勇爲捍禦十六年鳳陽總督馬士英
遣使者李章玉徵貴州兵討賊迂道掠江西爲樂平吏民所
拒擊比抵徽州境吏民以爲賊率衆破走之章玉諱激變謂

聲及徽州推官吳翔鳳主使士英以聞聲兩疏陳辨帝察其
無罪不問其年冬廷臣交薦卽命名用促入都陛見未赴而
京師陷福王立於南京超擢聲左僉都御史聲堅不起

大清兵破南京列郡望風迎降聲以閏六月懸高皇帝像率
士民拜哭糾集義勇保績溪黃山分兵扼六嶺寧國丘祖德
涇縣尹民興徽州溫璜貴池吳應箕等多應之乃遣使通表
唐王授聲右都御史兼兵部右侍郎總督諸道軍拔旌德寧
國諸縣九月下旬徽故御史黃澍降於

大清

王師間道襲破之聲被執至江寧語門人江天一曰子有老
母不可死對曰天一同公起兵可不同公殉義乎遂偕死唐


王贈聲禮部尚書諡文毅天一字文石歛諸生

丘祖德字念修成都人崇禎十年進士授寧國推官以才調
濟南用薦超擢僉事分巡東昌山東土寇猖獗帝因給事中
張元始言令祖德及東兗道李恪專任招撫寇多解散十五
年調官沂州其冬用兵部尚書張國維薦擢右僉都御史巡
撫保定十六年望察典解職候勘事白以故官代王永吉撫
山東京師覆賊遣使招降祖德斬之謀發兵拒守會中軍梅
應元叛率部卒索印祖德乃南奔福王時御史沈宸荃劾祖
德及河道總督黃希憲輕棄封疆詔削籍提訊久之獲釋而
成都亦陷無家可歸流寓寧國金聲起兵績溪祖德與寧國
舉人錢龍文諸生麻三衡沈壽堯等各舉兵應之時郡城已

失祖德駐華陽三衡駐稽亭他蠡起者又十餘部約共攻郡
城不克壽堯陣歿祖德退還山中

大兵攻拔其寨被獲磔死其子亦死越四日三衡軍敗亦死
三衡字孟璿布政使溶孫也與同邑沈壽民梅朗中銅陵沈
士柱竝有聲以詩酒自豪兵既起旁近吳太平阮恆阮善長
劉鼎甲胡天球馮百家與俱起號七家軍皆諸生也每戰三
衡執大刀陷陣戰敗被執賦詩死太平等亦死壽堯字景山
都督有容子

溫璜初名以介字于石烏程人大學士體仁再從弟也母陸
守節被旌璜久為諸生有學行崇禎十六年秋舉進士授徽
州推官甫莅任聞京師陷亟訓民兵為保障計明年南京亦



覆知府秦祖襄及諸僚屬皆遁璜歎曰城無主民且自相屠
乃盡攝其印召士民慰諭之金聲舉兵績溪璜與犄角且轉
餉給其軍而徙家屬於村民舍未幾聲敗璜嚴兵自守郡中
故御史黃澍以城獻璜趨歸村舍語妻茅同死妻無難色乃
匿幼子女他室而急呼長女起女方寢問何爲曰死爾女卽
延頸就悅未絕復刃之茅整衣以臥璜刀截其喉有頃呼曰
未也再刃而絕璜書遺令訖卽自剄越日甦遂絕粒閱五日
兩手自抉其創乃死

吳應箕字次尾貴池人善今古文意氣橫厲一世阮大鍼以
附璜削籍僑居南京聯絡南北附璜失職諸人劫持當道崇
禎九年京師有警應箕與無錫顧杲桐城左國材蕪湖沈士

柱餘姚黃宗羲長洲楊廷樞等爲留都防亂公揭討之列名
者百四十餘人皆復社諸生也十五年以鄉試副榜貢入京
公卿咸加禮異後大鍼得志謀殺周鏞應箕獨入獄護視大
鍼聞急遣騎捕之應箕夜亡去南都不守起兵應金聲敗走
山中被獲慷慨就死杲字子方光祿卿憲成從子也爲人豪
邁好倚酒罵座居恆與應箕張髯抵掌言天下可悲憤事輒
痛哭哭罷輒狂歌旣共討大鍼及大鍼得志捕杲及國材諸
人將興大獄會國亡乃止南都旣覆散家財募士千人取道
江陰江陰人以爲賊集衆禦之被殺其同時舉兵者有尹民
興吳漢超龐昌胤謝球司石磐王湛魯之璵民興字宣子崇
禎初舉進士歷知寧國涇二縣除奸釐蠹有神明之稱行取

入都爲陳啓新所訐謫福建按察司檢校十五年春疏陳時務十四事帝喜召爲職方主事數召對言多當帝意卽擢本司郎中周延儒出督師命從軍贊畫延儒被譴下民興吏除名久之始釋福王立起故官尋謝病歸流寓涇縣南京失與諸生趙初浣等據城

大兵攻破城初浣死之民興走免唐王以爲御史事敗歸卒於家漢超宣城諸生崇禎十七年聞都城變哭文廟謀募兵赴難會福王立乃已明年南都覆棄家走涇縣從尹民興起兵兵敗匿華陽山中先是丘祖德麻三衡諸軍潰保華陽有徐淮者部署之漢超與合連取句容溧水高淳溧陽涇太平諸縣明年正月襲寧國夜緣南城登兵潰城中按首事者漢

超已出城念母在且恐累族人入見曰首事者我也剖其腹膽長三寸妻戚自擲樓下死昌胤西充人崇禎十年進士授青陽知縣南京覆走匿九華山謀舉兵事洩被執夜死旅店中球溧陽諸生僉事鼎新子也毀家募兵兵散被執而死石磐鹽城諸生與都司鄆某同舉兵兵敗被執鄆言此儒生吾劫之爲書記爾石磐曰吾首事奈何諱之繫獄六十餘日狂歌痛飲與鄆偕死湛太倉諸生城已下與兄淳復集里人數百圍城城中兵出擊淳赴水死湛被斫死之璵歷官副總兵駐福山蘇州旣降諸生陸世鏞聚衆焚城樓之璵率千人入城與

大兵戰潰走之璵戰死其時從容就義者有六合諸生馬純

仁如皐布衣許德溥邳州監生王台輔純仁字樸公南京既下六合卽歸附純仁函書付其妹曰吾三日不歸以此白父母乃題銘橋柱抱石投水死三日後妹發其函則殉國永訣語也德溥字元博吏部員外郎直族子聞賊陷京師慟哭數日後聞南都覆亦如之每獨居輒哭食必置崇禎錢於案上祭而後食一日刺四字於胸曰不愧本朝又刺八字於臂曰生爲明人死爲明鬼有發其事者執見縣令不跪呵之曰若布衣未嘗食祿刺此何爲荅曰不忍忘故國爾執送巡江御史亦不跪御史命逮其父乃跪曰吾爲父屈爾御史義之免其父以德溥名聞臨刑慨然曰今日得見先帝吾事畢矣台輔字贊化崇禎末復遣宦官出鎮台輔草疏將極諫甫入都

都城陷慟哭南還福王立東平伯劉澤清御史王燮張樂大宴於睢寧台輔衰絰直入責之曰國破君亡此公等臥薪嘗膽食不下咽之時顧置酒大會邪左右欲鞭之燮曰狂生也命引去及南京覆台輔泣然流涕曰吾誰氏之民也可使食有他粟乎起視其廩曰此吾所樹盡此死明年粟盡集其里黨深衣幅巾出見之大呼烈皇帝北面再拜自縊死俄有僧過之持麻鞭指其屍曰此常事也忍用是於張爲後數月渡河來者言石屋寺一僧縊死麻鞭在其側

侯峒曾字豫瞻嘉定縣人給事中震暘子也舉天啓五年進士顧秉謙欲召致之畀以館選峒曾不謁選而歸已授南京武選主事丁父憂崇禎七年入都兵部尚書張鳳翼薦爲職

方郎中峒曾辭改南京文選主事陸文聲許張溥御史倪元
珙以右溥罷去山東元瑋代之峒曾爲言復社本末及文聲
無賴狀瑋納其言禍得無蔓由稽勲郎中遷江西提學參議
給事中耿始然督賦至監司以屬禮見峒曾獨與抗禮益王
勢方熾歲試黜兩宗生王怒使人誚讓峒曾不爲動江右人
頌其公明謂數十年所未有遷廣東副使不赴起浙江右參
政分守嘉湖漕卒擊傷秀水知縣李向中峒曾請於撫按捕
戮首惡部內肅然吏部尚書鄭三俊舉天下賢能監司五人
峒曾與焉召爲順天府丞未赴而京師陷福王時用爲左通
政辭不就及南京覆州縣多起兵自保嘉定士民推峒曾爲
主偕里人黃淳耀張錫胤龔用圓馬元調唐全昌夏雲蛟等

誓死固守

大兵畢力攻峒曾乞師於吳志葵志葵遣遊擊蔡祥以七百
人來赴一戰失利束甲遁外援遂絕城中矢石俱盡七月三
日大雨城隅崩架巨木支之明日雨益甚城大崩

大兵入峒曾拜家廟孳二子元演元潔竝沈於池錫胤舉崇
禎三年鄉試嘗却旅館奔婦歲凶請有司瘞道殣千人故人
葉生無嗣爲葬其兩世至是城破自經妾何抱女沈水死用
圓天啓元年舉於鄉嘗爲秀水教諭與兄用廣相師友及是
竝赴水死元調全昌雲蛟竝諸生元調受學於邑人婁堅有
學行時年已七十矣皆死之全昌妻亦從死其時聚衆城守
而死者又有江陰閻應元崑山朱集璜之屬應元字麗亨順

天通州人崇禎中爲江陰典史十七年海賊顧三麻入黃田港應元往禦手射殺三人賊退以功遷英德王簿道阻不赴寓居江陰明年五月南京亡列城皆下閏六月朔諸生許用倡言城守遠近應者數萬人典史陳明遇至兵用徽人邵康公爲將而前都司周瑞龍泊江口相犄角戰失利

大兵逼城下徽人程璧盡散家貲充餉而身乞師於吳淞總兵吳志葵志葵至璧遂不返康公戰不勝瑞龍水軍亦敗去明遇乃請應元入城屬以兵事

大兵力攻城應元守甚固東平伯劉良佐用牛皮帳攻城東北城中用砲石力擊良佐乃移營十方庵令僧陳利害良佐旋馬至應元誓以大義屹不動及松江破

大兵來益衆四圍發大砲城中死傷無算固守自如八月二十一日

大兵從祥符寺後城入衆猶巷戰男婦投池井皆滿明遇用皆舉家自焚應元赴水被曳出死之訓導馮厚敦字培卿金壇人冠帶縊於明倫堂妹及妻王結衽投井死明遇浙江人居官以長厚稱破家徇義與應元死守孤城八十日其邑人城破殉難者中書舍人戚勳舉人夏維新諸生王華呂九韶而貢生黃毓祺逸去不與難勳字伯屏崇禎末乞假歸至臨清而京師陷還赴南京令督餉福建甫竣事旋里南京亦失勳入城佐應元拒守城破令妻及子女子婦先縊乃北而再拜舉火自焚從死者二十人維新華九韶武進人武進降避

之江陰自刎死毓祺好學有盛名精釋氏學與門人徐趨舉兵行塘以應城內兵城陷兩人逸去明年冬趨偵江陰無備率壯士十四人襲之不克皆死趨被執死毓祺既逸去避江北其子大湛大洪被收兄弟方爭死而毓祺以救印事發逮繫江寧獄將刑其門人告之期命取襲衣自斂跌坐而逝集璜字以發崑山歲貢生學行爲鄉里所推教授弟子數百人數諭郡邑中利害當事者多聽之南京既亡崑山人議拒守而縣丞閻茂才已遣使迎降用爲知縣縣人共執殺茂才以六月望推舊將王佐才爲主集璜及周室瑜陶琰陳大任等竝舉兵參將陳宏勛前知縣楊永言率壯士百人爲助佐才亦邑人嘗官狼山副總兵年老矣

大兵至宏勛率舟師迎戰敗還遊擊孫志尹戰歿城陷永言遁去佐才縱民出走而已冠帶坐帥府被殺集璜投東禪寺後河死門人孫道民張謙同日死室瑜舉於鄉官儀封知縣城破與子朝鑛同死妻諸被執死之朝鑛妻王自縊死琰爲諸生受業同里蔡懋德所居雞鳴堂去城二十里城被困率鄉兵赴援未至而城潰還家自經大任貢生倡義迎佐才以其它爲帥府城將破大任已出走復入城死之妻張子思翰皆死時以守禦死者蘇達道莊萬程陸世鏜陸雲將歸之甲周復培陸彥冲代父死者沈徵憲朱國軾救母死者徐洛從容自盡者徐澂王在中吳行貞

沈猶龍字雲升松江華亭人萬曆四十四年進士除鄞縣知

縣天啓初徵授御史出爲河南副使崇禎元年召復故官進太僕少卿拜右僉都御史巡撫福建江西妖賊張普薇等作亂猶龍遣遊擊黃斌卿協勦大破之增秩賜金以憂歸服闋起兵部右侍郎兼右僉都御史總督兩廣軍務兼廣東巡撫十七年冬福王召理部事不就乞葬親歸明年南京失守列城望風下圍六月吳淞總兵官吳志葵自海入江結水寨於泖湖會總兵官黃蜚擁千艘自無錫至與合猶龍乃偕里人李待問章簡等募壯士數千人守城與二將相犄角而參將侯承祖守金山八月

大兵至二將敗於春申浦城遂被圍未幾破猶龍出走中矢死待問守東門簡守南門城破俱被殺華亭教諭睦明永字嵩年丹陽人題詩明倫堂投繯死諸生戴泓赴池死嘉定舉人傅凝之參志葵軍事兵敗赴水死

大兵遂攻金山承祖與子世祿猶固守城既破巷戰踰時世祿中四十矢被獲死之承祖亦被獲說之降曰吾家食祿二百八十年今日不當以死報國哉遂被殺志葵蜚旣敗執至江陰城下令說城中人降志葵說之蜚不語城迄不下後皆被殺待問字存我崇禎末進士授中書舍人工文章兼精書法簡字坤能舉於鄉官羅源知縣承祖字懷玉世金山衛指揮

陳子龍字臥子松江華亭人生有異才工舉子業兼治詩賦古文章卓絕流輩崇禎十年舉進士選紹興推官東陽諸生許

都者副使達道孫也家富任俠好施陰以兵法部勒賓客子弟思得一當子龍嘗薦諸上官不用東陽知縣姚孫棐桐城人也以備亂斂士民貲坐都萬金都乞免不得適義烏奸人假中貴名招兵事發孫棐謂都結黨謀逆持之急都葬母山中會者萬人或告監司王雄曰都反矣雄遽遣使收捕都遂反旬日間聚眾數萬連陷東陽義烏浦江遂逼郡城既而引去巡撫董象恆坐事逮代者未至巡按御史左光先以撫標兵命子龍爲監軍討之稍有俘獲而遊擊蔣若來破其犯郡之兵都乃率餘卒三千保南砦雄欲撫賊語子龍曰賊聚糧據險官軍不能仰攻非曠日不克我兵萬人止五日糧奈何子龍曰都舊識也請往察之乃單騎入都營責數其罪諭令

歸降待以不死乃挾都見雄復挾都走山中散遣其衆而以二百人降光先與孫棐同里姻連竟斬都等六十餘人於江澣子龍爭不能得以定亂功擢兵科給事中命甫下而京師陷乃事福王於南京其年六月言防江之策莫過水師海舟議不可緩請專委兵部主事何剛訓練從之太僕少卿馬紹愉奉使陞見語及陳新甲主款事王曰如此新甲當恤廷臣無應者獨少詹陳盟曰可因命予恤且追罪嘗劾新甲者廷臣懲劉孔昭殿上相爭事不敢言子龍與同官李清交章力諫事獲已未幾列上防守要策請召還故尚書鄭三俊都御史易應昌房可壯孫晉竝可之又言中使四出搜巷凡有女之家黃紙貼額持之而去閭井騷然明旨未經有司中使私

自搜採甚非法紀乃命禁訛傳誑惑者諸生涂仲吉以救黃道周廷杖舉人祝淵以爭劉宗周不當黜被逮子龍請擢寘言路不從子龍又言中興之主莫不身先士卒故能光復舊物今入國門再旬矣人情泄沓無異昇平清歌漏舟之中痛飲焚屋之內臣不知其所終其始皆起於姑息一二武臣以至凡百政令皆因循遵養臣甚爲之寒心也亦不能聽明年二月以時事不可爲乞終養去子龍與夏允彝同負重名允彝死子龍念祖母年九十不忍割道爲僧尋以受魯王部院職銜結太湖兵欲舉事事露被禽乘間投水死子龍爲文宗魏晉其駢體精妙徐陵庾信弗能過也其時被禽而死者有顧咸建唐自縊咸建字漢石崑山人大學士鼎臣曾孫也崇

禎十六年舉進士授錢塘知縣甫之官聞京師陷人情洶洶咸建戢奸宄嚴警備巡按御史彭遇颯以貪殘激變賴咸建調護事寧而民免株連及南都失守鎮江守將鄭彩等率衆還閩緣道劫掠咸建出私財迎犒乃斂威去亡何馬士英擁兵至巡撫張秉貞遣咸建往迓咸建力請駐師城外頃之大將方國安兵亦至咸建謀於上官先期遣使行賂兵乃不入城四鄉悉被兩人兵淫掠而城中得無擾時監司及郡邑長吏悉逋竄咸建散遣妻子獨守官不去及

大清兵壓境潞王將出降遣咸建犒師既復命卽出城去尋被執死之自彩達州人臨安知縣杭州失守與從子階豫逃山中有言自彩受魯王敕陰部署爲變遂被捕獲自彩麾階

豫走不從兩人竟同死

夏允彝字彝仲松江華亭人弱冠舉於鄉好古博學工屬文是時東林方講學蘇州高才生張溥楊廷樞等慕之結文會名曰復社允彝與同邑陳子龍何剛徐孚遠王光承輩亦結幾社相應和名重海內崇禎十年與子龍同舉進士授長樂知縣善決疑獄他郡邑不能決者上官多下長樂居五年邑大治吏部尚書鄭三俊舉天下廉能知縣七人以允彝爲首帝召見大臣方岳貢等力稱其賢將特擢會丁母憂未及用北都變聞慟哭累日毀家倡義走謁尚書史可法與謀興復聞福王已立乃還其年五月擢吏部考功司主事疏請終制不赴及馬士英阮大鍼亂政重允彝名屢爲好辭招之拒不

應服旣除猶不起御史徐復陽者故逆案中人至是復官希要人指劾允彝及其同官文德翼居喪授職爲非制以兩人皆東林也兩人實未嘗赴官無可罪吏部尚書張捷遠議貶秩調用時論爲不平未幾南都失傍徨山澤間欲有所爲聞友人徐石麒侯峒曾黃淳耀徐汧等皆死乃以八月中賦絕命詞自投深淵以死允彝學務經世歷朝制度暨昭代典章無所不諳習獨處一室志常在天下名旣高四方人士爭走其門書問往來酬荅無暇晷好獎勵後進有片善稱之不容口多因以成材與子龍齊名晚節亦略相似人謂白首同所歸云子完淳字存古生有異稟七歲能詩文年十三擬庾信作大哀賦文采宏逸允彝死後二歲以子龍獄詞連及亦逮

下吏談笑自如作樂府數十闕臨刑神色不變年甫十八允
彝兄之旭字元初以諸生貢於廷有聲南都失欲與允彝俱
死允彝託以妻子乃不果自此不入城市亦以子龍故作絕
命詞從容謁文廟自縊復聖位芻豢遠字闇公舉崇禎十五
年鄉試松江破遁入海死於島中光承字玠右福王時被徵
知時不可爲佯墮驢傷足歸與弟烈偕隱石筍里屏迹城市
以終

楊文驄字龍友貴陽人浙江參政師孔子萬曆末舉於鄉崇
禎時官江寧知縣御史詹兆恆劾其貪汙奪官候訊事未竟
福王立於南京文驄戚馬士英當國起兵部主事歷員外郎
郎中皆監軍京口以金山踞大江中控制南北請築城以資

守禦從之文驄善書有文藻好交游于士英者多緣以進氣
焰赫然其爲人豪俠自喜頗推獎名士士亦以此附之明年
遷兵備副使分巡常鎮二府監大將鄭鴻逵鄭彩軍及

大清兵臨江文驄駐金山扼大江而守五月朔擢右僉都御
史巡撫其地兼督沿海諸軍文驄乃還駐京口合鴻逵等兵
南岸與

大兵隔江相持

大清兵編大筏置燈火夜放之中流南岸軍發砲石以爲克
敵也日奏捷初九日

大兵乘霧潛濟迫岸諸軍始知倉皇列陣甘露寺

大兵以鐵騎衝之悉潰文驄走蘇州十三日

大兵破南京百官盡降命鴻臚丞黃家鼐往蘇州安撫文驄襲殺之遂走處州時唐王已自立於福州矣初唐王在鎮江時與文驄交好至是文驄遣使奉表稱賀鴻達又數薦乃拜兵部右侍郎兼右僉都御史提督軍務令圖南京加其子鼎卿左都督太子太保鼎卿士英甥也士英遣迎福王遇王於淮安王貧婁甚鼎卿賙給之王與定布衣交以故寵鼎卿甚及鼎卿上謁王以故人子遇之獎其父子擬以漢朝大小耿然其父子以士英故多爲人詆謫明年衢州告急誠意侯劉孔昭亦駐處州王令文驄與其援衢七月

大兵至文驄不能禦退至浦城爲追騎所獲與監紀孫臨俱不降被戮臨字武公桐城人兵部侍郎晉之弟文驄招入幕奏爲職方主事竟與同死其時起兵旁掠郡縣者有吳易字日生吳江人生有膂力跡弛不羈崇禎末成進士福王時謁史可法於揚州可法異其才題授職方主事爲已監軍明年奉檄徵餉江南未還而揚州失已而吳江亦失易走太湖與同邑舉人孫兆奎諸生沈自嗣自炳武進吳福之等謀舉兵旬日得千餘人屯於長白蕩出沒旁近諸縣道路爲梗唐王聞之授兵部右侍郎兼右僉都御史總督江南諸軍文驄奏易斬獲多進爲兵部尚書魯王亦授易兵部侍郎封長興伯八月

大兵至易遂敗走父承緒妻沈及女皆投水死自嗣自炳福之亦死焉兆奎被獲一軍盡殲明年易鄉人周瑞復聚衆長

白蕩迎易入其營八月事洩被獲死之福之鍾巒子也兆奎
兵敗時慮易妻女被辱視其死而後行故被獲械至江寧死
之

明史藁

列傳一百五十三

明史藁

列傳一百五十四

光祿大夫 經筵講官明史總裁戶部尚書加七級臣王鴻緒奉
敕編撰

楊廷麟

彭期生

萬元吉

郭維經

詹兆恆

陳泰來

胡夢泰

王養正

曾亨應

鄭為虹

陳子壯

張家玉

陳邦彥

蘇觀生

楊廷麟字伯祥清江人舉崇禎四年進士改庶吉士授編修
勤學嗜古聲震館閣間與黃道周善十年冬皇太子將出閣
簡充講官兼直經筵廷麟具疏力讓道周不許明年二月帝
御經筵問保舉考選何者為得人廷麟言保舉當嚴舉主如

唐世濟王維章乃溫體仁王應熊所薦今二臣皆敗而舉至無恙是連坐之法先不行於大臣欲收保舉效得乎帝爲動色其冬

大清兵逼京師廷麟上疏劾兵部尚書楊嗣昌言陛下有撻伐之志大臣無禦侮之才謀之不臧以國爲戲嗣昌及薊遼總督吳阿衡內外扶同朋謀悞國與高起潛方一藻倡和款議武備頓忘以至於此今可憂在外者三在內者五督臣盧象昇以禍國責樞臣言之痛心夫南仲在內李綱無功潛善秉成宗澤隕命乞陛下赫然一怒明正向者主和之罪俾將士畏法無有二心召見大小諸臣咨以方略諭象昇集諸路援師乘機赴敵不從中制此今日急務也時嗣昌意主和議

冀紓外患而廷麟痛詆之嗣昌大恚詭薦廷麟知兵帝卽召見改兵部職方主事贊畫象昇軍象昇得之甚喜卽令往直定轉餉濟師及象昇戰死賈莊嗣昌急問偵卒楊贊畫死朱以奉使在外對嗣昌爲不懌者久之初張若麒沈迅官刑曹謀改兵部御史涂必泓沮之必泓廷麟同里也兩人疑疏出廷麟指因與嗣昌比而搆廷麟會廷麟報軍中曲折嗣昌擬旨責以欺罔及事平欲中以危法帝察其無罪貶秩調外而已黃道周獄起詞連廷麟逮治未至而道周已釋言者多薦廷麟侍郎惠世揚請俟其至用之十六年秋復授職方主事未赴都城失守廷麟慟哭募兵勤王會福王立用御史祁彪佳薦召爲左庶子辭不就宗室朱統鑣誣劾大學士姜曰廣

并誣廷麟召健兒有不軌謀以曰廣爲內應其語絕狂誕王不問然竟散所募兵

順治二年南都破江西諸郡所存者惟贛州唐王手書加廷麟吏部右侍郎劉同升國子祭酒同升自雩都至贛與廷麟協謀大舉乃偕巡撫李永茂集士大夫於明倫堂勸輸兵餉九月

大兵屯泰和副將徐必達戰大敗廷麟自督師與同升乘虛復吉安臨江加兵部尚書兼東閣大學士賜劍便宜從事十月

大兵攻吉安必達戰敗赴水死會廣東援兵至

大兵退屯峽江已而萬元吉至贛十二月同升卒三年正月

廷麟赴贛招峒蠻張安等四營降之以元吉代守吉安三月廷麟聞王將赴贛往朝之甫行以吉安警留屯城外日馳疏陳援吉防贛事宜以何吉安復失元吉退保贛州四月

大兵逼城下兵部侍郎劉士禎促新軍將張安赴援安宵遁贛圍急廷麟遣使調廣西狼兵而身往雩都趣新軍來救五月望戰梅林再敗退保雩都廷麟乃散其兵以六月入贛與元吉憑城守未幾援兵至圍暫解已復合廷麟等分門拒守至八月水師戰敗援師悉潰時被圍已半年守陴者悉懈十月四日

大兵登城廷麟急督士民拒戰久之力不支廷麟走西城投水死同守者郭維經彭期生輩盡死期生字觀我海鹽人御

史宗孟子舉萬曆四十四年進士授徽州教授遷國子博士
歷都水主事員外郎中遷長沙知府再調揚州南昌崇禎初
以憂去補濟南坐失囚謫布政司照磨量移應天推官轉南
京兵部主事進郎中十六年張獻忠亂江西遷湖西兵備僉
事駐吉安

順治二年兵入南昌逼吉安期生拒守不支城破走贛州偕
廷麟招降張安等唐王加太常寺卿仍令視兵備事城破冠
帶自縊死一時同殉者職方主事周瑚磔死通判王明汲編
修兼兵科給事中萬發祥吏部主事龔茶戶部主事林琦兵
部主事王其宏黎遂球柳昂霄魯嗣宗錢謙亨中書舍人袁
從鶚劉孟錡劉應試推官署府事吳國球監紀通判郭寧登

臨江推官胡纘贛縣知縣林逢春皆被戮鄉官盧觀象盡驅
男婦大小入水乃自沈死舉人劉日佺偕母妻弟婦子姪同
日死參將陳烈數力戰衆以其弟已降

大清疑之烈益奮勇疾鬪及見執其弟勸之降不聽顧謂贛
人曰今日方知我無二心也乃被戮

萬元吉字吉人南昌人天啓五年進士授潮州推官補歸德
捕大盜李守志散其黨崇禎四年大計謫官十一年秋用曾
櫻薦命以永州檢校署推官事居二年督師楊嗣昌薦其才
改大理右評事軍前監紀嗣昌倚若左右手諸將亦悅服馳
驅兵間未嘗一夕安枕嗣昌卒元吉丁內艱歸十六年起南
京職方主事進郎中福王立仍故官元吉以四鐘不和請奉

詔宣諭又請發萬金犒高傑於揚州諭以大義令保江淮乃渡江詣諸將營傑與黃得功劉澤清方爭揚州元吉與得功書令共獎王室得功報書如元吉指乃錄其藁示澤清傑嫌漸解俄上言朝廷不當偏安宜且仍南京故名示不怠恢復而大減錦衣旗尉罷南北兩鎮撫司以杜告密時廷議以元吉能輯諸鎮擢太僕少卿監視江北軍務元吉身在外不忘朝廷數有條奏請修建文實錄復其尊稱并還懿文追尊故號祀之寢園以建文配而速褒靖難死事諸臣及近日北都四方殉難者以作忠義之氣從之又言先帝天資英武銳意明作而禍亂益滋寬嚴之用偶偏任議之徒太畸也先帝初懲逆璫用事委任臣工力行寬大諸臣徂之爭意見之

略綢繆之桑土敵入郊圻束手無策先帝震怒宵小乘間中以用嚴於是廷杖告密加派抽練使在朝者不服救過在野者無復聊生廟堂號振作而敵強如故寇禍彌張十餘年來小人用嚴之效如是先帝亦悔更從寬大悉反前規天下以爲太平可致諸臣復競賄賂肆欺蒙每趨愈下再櫻先帝之怒誅殺方興宗社繼沒蓋諸臣之孽每乘於先帝之寬而先帝之嚴亦每激於諸臣之玩臣所謂寬嚴之用偶偏者此也國步至今艱難已極乃議者求勝於理卽不審勢之重輕好伸其言多不顧事之損益殿上之彼已日爭鬪外之從違遙制一人任事衆口議之如孫傳庭守關中識者俱謂不宜輕出而已有以逗撓議之者矣賊旣渡河臣語史可法姜曰廣

急撤關寧吳三桂俾隨樞輔迎擊之先帝召對時羣臣亦曾及此而已有以蹙地議之者矣及賊勢燎原廷臣或勸南幸或勸皇儲監國南都皆權宜善計而已有以邪妄議之者矣由事後而觀咸追恨議者之悞國倘事幸不敗必共服議者之守經大抵天下事無全害亦無全利當局者非樸誠通達誰敢違衆獨行旁持者競意氣筆鋒必欲強人從我臣所謂任議之途太崎者此也乞究前事之失爲後事之師以寬爲體以嚴爲用蓋崇簡易推真誠之謂寬而濫賞縱罪者非寬辨邪正綜名實之謂嚴而鉤距索隱者非嚴寬嚴得濟任議乃合仍請於任事之人嚴覈始進寬期後效無令行間再踵藏垢邊才久借燃灰收之以嚴然後可任之以寬也詔褒納

之已入朝復遣往江北調輯軍民時高傑欲赴河南討賊元吉方請速予之餉而傑襲得功於儀真元吉心傷之因言古大將保功名必以恭順爲本今朝廷新立綱紀未尊恐從此相浴恭順日替輕朝廷墮綱紀臣罪滋大因請罷斥不許明年三月給事中楊兆升劾之以元吉有勞不問南京覆走福建歸唐王六月我

大清兵已取南昌袁州臨江吉安踰月又取建昌惟贛州孤懸上游兵力單寡人情惴懼會益府永寧王慈炎招降峒賊張安遣復撫州南贛巡撫李永茂乃命副將徐必達扼泰和拒

大兵未幾戰敗至萬安遇永茂永茂遂奔贛八月叛將白之

裔入萬安江西巡撫曠照被執知縣梁于溪死之于溪江都人崇禎十六年進士時唐王詔適至贛永茂乃與楊廷麟劉同升共舉兵未幾王召永茂為兵部右侍郎以張朝繼代甫任事擢元吉兵部右侍郎兼右副都御史總督江西湖廣諸軍召朝繼還以同升代元吉至贛同升已卒遂以元吉兼巡撫

順治三年三月廷麟迎謁王元吉代守吉安初崇禎末命中書舍人張同敞調雲南兵未至福王又趣之及抵江西南京已失因退還吉安廷麟留與其守用客禮待之其將趙印選胡一青頻立功而元吉約束甚嚴諸將漸不悅時有廣東兵亦以赴援至而張安者汀贛間峒賊四營之一驍勇善戰既

降有復撫州功且招他營盡降賜名龍武新軍元吉以安等為足恃也蔑視雲南廣東軍雲南廣東軍解體然安卒故為賊居贛城淫掠自如廷麟遣援湖西所過無不殘破及是大兵逼吉安諸軍皆內攜新軍又先往湖西不時至城中軍不戰潰城遂破元吉退屯皂口檄諭贛州極言雲南兵棄城罪其眾遂西去四月

大兵逼皂口元吉不能禦入贛城

大兵乘勝抵城下給事中楊文薦元吉門生也奉命往湖南過贛見事急自任守禦城中賴之元吉素有才蒞事精敏及失吉安士不用命昏然坐城上對將吏不交一言隔河大營遍山麓指為空營兵民從大營中至言敵勢盛輒叱為間諜

斬之江西巡撫劉遠生令張琮者將兵趨湖東及贛圍急遠生自出城召琮於雩都贛人曰撫軍遁矣怒焚其舟拘遠生妻子俄遠生率琮兵至贛人乃大悔琮軍渡河抵梅林中伏大敗還至河爭舟多死於水遠生憤甚五月朔渡河再戰身先士卒遇

大兵被獲復逃歸而龍武軍先往湖西者聞撫州復失仍還雩都延麟躬往邀之與

大兵戰梅林再敗乃散遣其軍而身入城與元吉同守自遠生敗援軍皆不敢前六月望李永茂所遣副將吳之蕃等以廣東兵五千至

大兵爲解圍屯於水西之蕃亦退保南康未幾圍復合城中

拒如初時贛困守久王獎勞之賜名忠誠府加元吉兵部尚書文薦右僉都御史使尚書郭維經來援維經與御史姚奇肩沿途募兵得八千人元吉部將汪起龍率師數千雲南援將趙印選胡一青率師三千大學士蘇觀生遣兵如之兩廣總督丁魁楚亦遣兵四千延麟又收集散亡得數千先後至贛營於城外軍聲頗振諸將欲戰元吉待水師至并擊而中書舍人來從諤募砂兵三千吏部主事龔葵兵部主事黎遂球募水師四千皆屯南安不敢下主事王其宥謂元吉曰水師帥羅明受海盜也桀驁難制荼遂球若慈母之奉驕子且今水涸巨舟難進豈能如約不聽及八月大兵聞水師將至卽夜截諸江焚巨舟八十死者無算明受

遁還舟中火藥戎器盡失於是兩廣雲南軍皆不戰而潰他營亦稍稍散去城中止起龍維經部卒四千餘人城外水師後營二千餘人而已參將謝志良擁眾萬餘於雩都不敢進廷麟調廣西狼兵八千人踰嶺亦不即赴會聞汀州破人情益震懼守者亦疲甚十月初

大兵用嚮導夜登城鄉勇猶巷戰黎明兵大至城上發砲砲炸城遂破元吉死之先是元吉禁婦女出城其家人潛載其妾絕城去元吉遣飛騎追還痛捶其家人故城中無敢出者及城破部將擁元吉出城元吉歎曰為我謝贛人使闔城塗炭者我也我何可獨存遂赴水死年四十有四文薦字幼字京山人由進士為兵科給事中城破時病困不能起執送南

昌絕粒而卒

郭維經字六修江西龍泉人天啓五年進士授行人崇禎三年遷南京御史疏陳時弊中有所舉刺帝責令指實乃極稱順天府尹劉宗周之賢力詆吏部尚書王永光谿刻及用人顛倒罪帝置不問六年秋周延儒罷政溫體仁代之維經言執政不患無才有才而用之排正人不用之籌國事國事日非則委曰我不知坐視盜賊日猖邊警日急止與二三小臣爭口舌角是非平章之地幾成聚訟可謂有才邪帝切責之庶子丁進典南畿試有私為南京御史黃昌所發給事中孫晉因言進體仁私人關節既獲乞下所司案驗帝親摘七卷黜之進乃獲罪吏部侍郎張捷薦逆案呂純如維經疏劾又

劾掌中府撫寧侯朱國弼貪殘皆不納憂去久之起故官北
都變聞南都諸臣有議立潞王者維經力主福王王立進應
天府丞仍兼御史巡視中城維經以加銜乃魏忠賢陋習力
辭不允俄上言聖明御極將二旬一切雪耻除兇收拾人心
之事絲毫未舉今偽官縱橫於鳳泗悍卒搶攘於瓜儀焚戮
剽掠之慘漸逼江南而廟廊之上不聞動色相戒惟以慢不
切要之務盈庭而議致啓旁門鬪捷足營鑽窺之隙穴作富
貴之階梯舉朝人心如狂如醉匹夫匹婦呼天憤鬱釀成災
禍乞令內外文武諸臣洗滌肺腸盡去刻薄偏私及恩怨報
復故習一以辦賊復仇爲事報聞馬士英薦阮大鍼廷臣力
爭史可法進調停之說謂前監國詔有逆案不許起用諸臣

去之後來何故復入此示人以隘維經駁可法失言云英
大鍼深疾之尋遷大理少卿左僉都御史給事中吳适言維
經輯寧都城有成效宜責成彈壓乃命專督五城御史察非
常清輦轂明年二月隆平侯張拱日劾之言迎恭皇御容維
經託疾不欲觀盛典保國公朱國弼復言維經署大理事刑
部以僞防禦使武愭案會題維經以未經覆讞駁之愭已受
僞命何矜何疑執法之官甘心庇逆乞重懲乃下部院勘議
令回籍唐王召爲吏部右侍郎

順治三年五月

大兵圍贛州王乃命維經爲吏兵二部尚書兼右副都御史
總理湖廣江西廣東浙江福建軍務督師往援維經與御史

姚奇肩募兵八千人入贛州與楊廷麟萬元吉協守及城破維經入嗟峨寺自焚死奇肩亦死之奇肩字有僕錢塘人由進士授南海知縣地富饒多盜賊奇肩絕苞苴力以弭盜爲事政聲大起入爲兵部主事改監察御史巡按廣東未任與維經赴援遂同死

詹兆恆字月如廣信永豐人父士龍順天府尹兆恆舉崇禎四年進士授甌寧知縣民居失火延學宮兆恆率諸生奔烟榻中抱木主以出尋倡率重建他善政甚多徵授南京御史疏陳盜鑄之弊帝下所司察核弊少衰十四年夏言燕齊二千里間寇盜縱橫行旅阻絕四方所輸餉金停滯中途者至數百萬宜急發京軍勦滅特命專官掩遺骸恤孤寡未言楚

豫之疆盡青燐白骨新徵舊逋斷無從出宜多方蠲貸又以南都勢危陳固根本數事帝竝采納明年夏言近日起廢詳於罪譴而未及降調者若何楷姚思孝之清真李模林蘭友之剛直成德之強項張采之博雅盛王贊費道周之循良皆宜亟用帝亦納之俄以賊陷含山犯無爲劾總督高斗光明年秋又以賊陷廬州臨江欲渡陳內外合防策再劾斗光請以史可法代斗光遂獲譴時江北民避亂盡走南京兆恆慮賊謀闖入處之城外爲嚴保伍察非常奸宄無所匿福王立擢兆恆大理寺丞馬士英薦阮大鍼令冠帶陛見兆恆言先皇手定逆案芟刈羣兇乃第一美政然十七年間此輩日夕聚謀欲翻者數矣賴先皇神明獨斷堅持不移今大仇未報

忽召見大鉞還之冠帶豈不上傷先皇之靈下短忠臣義士之氣哉疏奏命取逆案進覽兆恆卽上進而士英亦以是日進三朝要典大鉞竟起用其秋奉命祭告尋進本寺少卿使事竣卽旋里請告唐王立於福州兆恆表賀拜兵部左侍郎佐黃道周協守廣信

順治三年廣信破奔懷玉山聚衆數千人自保已進攻衢州之開化縣兵敗歿於陣同時陳泰來字剛長江西新昌人崇禎四年進士由宣城知縣入爲戶科給事中十五年冬都城戒嚴泰來陳戰守數策總督趙光抃言泰來與同官荆祚承素晰邊情行間奏報宜敕二臣參預報可泰來又自請假兵一萬肅清輦轂帝壯之卽改授兵科出視諸軍戰守方略召

對中左門至軍中奏界嶺失事狀劾副將柏永鎮論死以功遷吏科右給事中乞假歸福王時起刑科左給事中不赴順治三年唐王擢爲太僕少卿與萬元吉同守贛州再擢右僉都御史提督江西義軍李自成敗走武昌其部下散掠新昌境泰來大破之初益王起兵建昌泰來欲從之同邑按察使漆嘉祉舉人戴國士持不可已而新昌破國士出降泰來惡之會上高舉人曹志明等兵起泰來與相結十二月攻取上高新昌寧州殺國士妻子遂取萬載已而大兵逼新昌守將出降泰來走界埠志明等從上高移軍會之進攻撫州兵敗皆死

胡夢泰字友蠡廣信鉛山人崇禎十年進士除奉化知縣邑

人戴澳官順天府丞怙勢不輸賦夢泰捕治其子其子急走京師懇澳令劾去夢泰澳念州民不當劾長吏而劫於其子姑出一疏言天下不治由守令貪污以陰詆夢泰及得旨令指實其子卽欲訐夢泰而澳念夢泰無可劾乃以嘉興推官文德翼平遙知縣王凝命實之給事中沈迅爲兩人訴枉發澳隱情澳下詔獄除名夢泰聲益起十六年夏史部會廷臣舉天下賢能有司十人夢泰與焉行取入都帝以畿輔州縣殘破欲得廉能者治之諸行取者悉出補夢泰得唐縣京師陷南歸唐王時授兵科給中奉使旋里

順治三年

大兵逼夢泰傾家募士與巡撫周定仍等守城圍數月城破

夫婦俱縊死定仍南昌人崇禎十六年進士與萬文英胡奇偉舉兵保廣信唐王卽以爲右僉都御史巡撫其地城破死之文英亦南昌人初爲鳳陽推官城破以子元亨代死得脫歸福王時起禮部主事丁艱不赴唐王授爲兵部員外郎監黃道周諸軍協守廣信諸軍敗於鉛山文英舉家赴水死奇偉進賢人歷官兵部主事唐王授爲湖東副使守廣信兵敗死之

王養正字聖功泗州人崇禎元年進士授海鹽知縣遭父喪服除起官秀水中大計補河南按察司照磨累遷襄陽推官刑部主事員外郎南康知府計殲巨寇鄧毛溪熊高一方賴之福王時進副使分巡建昌

順治二年五月南都破七月

大兵下江西巡撫曠昭棄南昌走瑞州列城望風潰養正乃與布政夏萬亨知府王域推官劉允浩南昌推官史夏隆起兵拒守閱三日有客兵內應城卽破養正等被執械至武昌與萬亨等同死其妻張氏聞之絕粒九日亦死萬亨字元禮崑山人起家舉人南昌失守避建昌與養正同死妻顧子婦陸及一孫一孫女先赴井死僕婢死者復十餘人域字元壽松江華亭人舉於鄉授宿州學正流賊至佐有司捍禦有功屢遷工部主事權稅蕪湖都城陷諸權稅者多以自入城歎曰君父遭非常禍臣子反因以爲利邪悉歸之南京戶部尋由郎中遷建昌知府城被圍分守南門城破亦械至武昌同

日死允浩掖縣人夏隆宜興人皆崇禎十六年進士時同死者六人一人失其姓名建昌人哀其忠哀而瘞之表曰六君子之墓初建昌南城諸生有鄧思銘者聞北都陷集其儕數十人爲庠兵期朔望習射學技擊爲國報仇請於有司有司笑曰庠可兵邪衆志遂懈思銘鬱鬱不得志明年城破死之建昌旣破新城知縣譚夢開迎降民潛導守關兵殺之夢開黨與民互相殘彌月不靖唐王用兵部侍郎吳春枝薦以邵武貢生李翔爲新城知縣翔至禽殺餘黨衆遂散然民習於亂佃人以田主徵租斛大聚數千人譟縣庭翔潛遣義兵三百詭稱鄭彩軍殺亂民明日復斬百餘級亂乃靖彩兵數萬駐新城畏

大兵遁入關獨監軍張家玉新城人徐伯昌與翔共守及
大兵逼家玉亦戰敗入關翔率民兵千餘出城拒擊

大兵從間道入城民兵皆散翔與伯昌死之伯昌字子期唐
王時由舉人授兵部主事改御史者也時江西郡邑吏城守
者又有李時興胡甲桂云時興福清人舉於鄉歷官袁州同
知攝府事會城已降時興力城守無何守將蒲纓兵潰湖廣
援將黃朝宣五營亦譟歸時興知不能守自縊於萍鄉官舍
一僕亦同死甲桂字秋卿崑山人崇順十二年以鄉試副榜
貢入國學授南昌通判遷永州同知以道梗改廣信至則南
昌袁州吉安俱失廣信止疲卒千人士民多竄徙會黃道周
以募兵至相與議城守已而道周敗歿勢益孤甲桂效死不

去城破被執諭降不從幽別室自經死

會亨應字子嘉臨川人父棟廣東布政使亨應舉崇禎七年
進士歷官吏部文選主事十五年秋有詔起廢亨應以毛士
龍李右讜喬可聘等十人上御史張懋爵劾其納賄行私亨
應疏辯懋爵三疏力攻遂謫貶去及南京覆江西列城皆不
守亨應命弟和應急奉父入闕而已與艾南英揭重熙謀拒
守會永寧王慈炎招連子峒土兵數萬復建昌入撫州寓書
亨應亨應募兵數百與相犄角一日方置酒宴客

大兵至宗族死者二十人部卒死者三百餘人亨應避石室
其從弟指示之遂被執并執其長子筠亨應顧筠曰勉之一
日千秋毋自負筠曰諾受刑先死釋亨應縛諭之降不荅被

戮和應雅尚名節聞兄死曰烈哉兄爲忠臣兒子爲孝子復何憾旣奉父入閩閩地失避之肇慶又失乃拜辭其父投井死先是棟弟棊爲蒲圻知縣死難棊兄益爲貴州僉事亦死難人稱曾氏五節云始亨應爲懋爵所許朝士頗疑之後亨應死節而懋爵竟降李自成爲直指使時有高飛聲者字克正長樂人崇禎六年舉於鄉授玉山知縣遷同知乞養去唐王時黃道周出督師邀與偕令攝撫州事

大兵至遣家人懷印走謁王而身守城死焉
鄭爲虹字天玉江都人崇禎十六年進士除浦城知縣唐王道浦城知其廉及自立召爲御史部民相率乞畱有十不可去之疏乃令以御史巡視仙霞關駐浦城尋令巡撫上游四

府兼領關務鄭芝龍步將奪民舟爲虹叱責之芝龍訴於王王爲諭解然是時芝龍已懷異志盡撤守關將仙霞嶺二百里間遂無一人

順治三年八月

大清兵長驅直入爲虹亟還浦城縱士民出走自守空城無何被執與給事中黃大鵬竝死之年二十有五大鵬字文若建陽人崇禎十三年進士爲義烏知縣有能聲唐王召爲兵科給事中從至建寧令與爲虹共守仙霞嶺竟同死時王在延平聞仙霞關失守倉猝走汀州守延平者爲王士和從走汀州者爲胡上琛熊緯皆以死事著士和字萬育金谿人崇禎中舉於鄉南京旣覆江西亦被兵士和避入閩授吏部司

務疏陳時政闕失凡數千言唐王刊賜文武諸臣且召士和入對嘉獎備至擢兵部主事未一月擢延平知府八月王走汀州畱兵部侍郎曹履泰偕士和居守俄警報壘至士和召父老曰吾雖一月郡守當與城存亡若等可速出毋使數萬生靈盡膏斧鑕衆泣士和亦泣退入內署謂友人曰吾一介書生數月而忝二千石安敢偷生其友勸止之正色曰君子愛人以德姑息何爲從容正衣冠閉戶投繯死上琛字席公世襲福州右衛指揮使好讀書能詩旣襲職復舉武鄉試唐王時官錦衣衛指揮遷署都督僉事充御營總兵官從至汀州王被執上琛奔還福州謂家人曰吾世臣不可苟活爲我採毒草來妾劉年甫二十願同死上琛喜曰汝幼婦亦能死

邪遂整冠帶與妾拜辭天地祖宗共飲藥酒而卒緯字文江南昌人崇禎十六年進士授行人兩京旣覆每飲酒輒涕泗橫流友人語之曰昔狼曠有言吾未獲死所子旣有志曷求所乎乃赴延平謁唐王擢給事中尋扈行至汀州遭變從官皆散緯仍奔赴遇

大兵死之

陳子壯字集生南海人萬曆四十七年以進士第三人授翰林編修天啓四年典浙江鄉試發策刺閹豎魏忠賢怒假他事削子壯及其父吏科都給事中熙昌籍崇禎初起子壯故官累遷禮部右侍郎流賊犯皇陵帝素服召對廷臣子壯言今日所急在收人心宜下罪已詔激發忠義帝納之乃會諸

臣列上蠲租清獄使過宥罪等十二事時以周唐二王奏逮治巡按御史及監司守令數人子壯慮諸王勢重有司不能舉職抗疏爭不納帝以海內多故思廣羅賢才下詔援祖訓郡王子孫文武堪任用者得考驗授職子壯慮爲民患立陳五不可會唐王上疏歷引前代故事詆子壯遂除名下獄言官疏救不聽坐贖徒歸久之廷臣交薦給事中姜琛劾其附邪黨逆帝不從起故官協理詹事府未上京師陷福王立起禮部尚書至蕪湖南京亦失守乃歸時桂王常瀛避難梧州子壯謂王神宗子宜立總督丁魁楚方集衆議而唐王聿鍵自立於福建議遂寢唐王召相子壯以前議宗室事有宿憾辭不行

順治三年

大兵下汀州桂王子永明王由榔爲丁魁楚等擁立於肇慶蘇觀生又議立唐王聿錡子壯沮不得退居邑之九江村永明王授子壯東閣大學士兼兵部尚書總督廣東福建江西湖廣軍務會

大兵入廣州聿錡被執死子壯止不行明年春張家玉陳邦彥及新會王興潮陽賴其肖先後舉兵子壯亦以八月起兵九江村兵多蛋戶番鬼善戰乃與邦彥約共攻廣州結故指揮使楊可觀等爲內應事洩可觀等死子壯駐五羊驛爲大兵擊敗走還九江村長子上庸陣歿會故御史麥而炫破高明迎子壯以故主事朱實蓮攝縣事實蓮子壯邑子也九

月

大兵克高明實蓮戰死子壯而炫俱執至廣州不降被戮子壯母自縊永明王贈子壯番禺侯諡文忠廢子上圖錦衣衛指揮使而炫字章闇高明人由進士歷上海安肅知縣唐王時爲御史實蓮字子潔由舉人歷官刑部主事初聿鏗之自立於廣州也召南海霍子衡爲太僕卿子衡字覺商舉萬曆中鄉試除海康教諭累遷國子監助教都察院司務戶部員外郎中袁州知府解職歸闕閩地盡失及聿鏗起爲卿而廣州亦旋失子衡召妾莫氏及三子應蘭應荃應芷語之曰禮歸難母苟免若輩知之乎三子皆應曰惟大人命子衡援筆大書忠孝節烈之家六字懸中堂易朝服北向拜又易緋袍

謁家廟先赴井死妾從之應蘭偕妻梁氏及一女繼之應荃應芷偕其妻徐氏區氏又繼之惟三孫得存有小婢見之亦投井死

張家玉字元子東莞人崇禎十六年進士授庶吉士李自成陷京師被執不能死上書自成請旌已門爲翰林院庶吉士張先生之廬而褒恤范景文周鳳翔等隆禮劉宗周黃道周尊養史可程魏學濂自稱殷人從周願學孔子稱自成大順皇帝自成怒召之入長揖不跪縛午門外三日復脅之降休以極刑卒不動自成曰當磔汝父母乃跪時其父母在嶺南家玉遽自屈人咸笑之賊敗南歸阮大鍼等攻家玉薦宗周道周於賊令收人望集羣黨家玉遂被逮明年南都失守脫

歸從唐王入福建擢翰林侍講監鄭彩軍出杉關謀復江西解撫州之圍

順治三年風聞

大兵至彩即奔入關家玉走新城

大兵來攻出戰中矢墮馬折臂走入關令以右僉都御史巡撫廣信廣信已失請募兵惠潮說降山賊數萬將赴贛州急

會

大兵克汀州乃歸東莞四年家玉與舉人韓如璜結鄉兵攻東莞城知縣鄭霖降乃籍前尚書李覺斯等賞以犒士甫三

日

大兵至家玉等敗走奉表永明王進兵部尚書無何

大兵來擊如璜戰死家玉走西鄉祖母陳母黎妹石寶俱赴水死妻彭被執不屈死鄉人殲焉西鄉大豪陳文豹奉家玉

取新安襲東莞戰赤岡未幾

大兵大至攻數日家玉敗走鐵岡文豹等皆死覺斯怨家玉甚發其先壘毀及家廟盡滅家玉族村市為墟家玉過故里

號哭而去道得眾數千取龍門博羅連平長寧攻惠州克歸善還屯博羅

大兵來攻家玉走龍門復募兵萬餘人家玉好擊劍任俠多與草澤豪士游故所至歸附乃分其眾為龍虎犀象四營攻

據增城十月

大兵步騎萬餘來擊家玉三分其兵犄角相救倚深谿高崖

自固大戰十日力竭而敗被圍數重諸將請潰圍出家玉歎曰矢盡砲裂欲戰無具將傷卒斃欲戰無人烏用徘徊不決以頸血濺敵人手哉因徧拜諸將自投野塘中以死年三十有三年永明王贈家玉少保武英殿大學士吏部尚書增城侯諡文烈其父兆龍猶在以子爵封之

陳邦彥字令斌順德人爲諸生意氣豪邁福王時詣闕上政要三十二事格不用唐王聿鍵讀而偉之既自立卽其家授監紀樞官未任舉於鄉以蘇觀生薦改職方主事監廣西狼兵援贛州至嶺聞汀州變勸觀生東保惠潮不聽會丁魁楚等已立永明王監國於肇慶觀生遣邦彥入賀王因贛州破懼逼已西走梧州邦彥甫入謁而觀生別立唐王聿錡於廣

州邦彥不知也夜二鼓王遣中使十餘輩召入舟中王太妃垂簾坐王西向坐魁楚侍語以廣州事邦彥請急還肇慶正大位以繫人心命南雄勅卒取韶制粵東十郡之七而委其三於唐王代我受敵從而乘其敵王大悅立擢兵科給事中齎敕還諭觀生抵廣州聞使臣彭耀被殺乃遣從人授觀生救而自以書曉利害觀生猶豫累日欲議和會聞永明王兵大敗不果邦彥遂變姓名入高明山中

順治三年冬十二月

大兵破廣州觀生死列城悉下邦彥乃謀起兵初贛州萬元吉遣族人萬年募兵於廣得余龍等千餘人未行而贛州失龍等無所歸聚甘竹灘爲盜他潰卒多附至二萬餘人總督

朱治憫招降之既而諫歸四年春

大兵定廣州克肇慶梧州敗走治憫殺魁楚前驅抵平樂永明王方自梧道平樂走桂林勢危甚邦彥乃說龍乘間圍廣州而已發高明兵由海道入珠江與龍會且遺張家玉書曰桂林累卵但得牽制毋西潯平間可完葺是我致力於此而收功於彼也家玉以爲然然龍卒故無紀律

大兵自桂林還救揚言取甘竹灘龍等顧其家輒退邦彥亦却歸既乃遣門人馬應芳會龍軍取順德無何

大兵至龍戰敗應芳被執赴水死四月龍再戰黃連江亦敗歿

大兵攻家玉於新安邦彥乃棄高明收餘衆徇下江門據之

初廣州之圍

大兵知謀出邦彥求其家獲妾何氏及二子厚遇之爲書招邦彥邦彥判書尾曰妾辱之子殺之身爲忠臣義不顧妻子七月與陳子壯密約復攻廣州子壯先至謀洩將引退邦彥軍亦至謀伏兵出珠洲側伺

大兵還救會城而縱火以焚舟子壯如其計果焚舟數十大兵引而西邦彥尾之會日暮子壯不能辨旂幟疑皆敵舟也陣動

大兵順風追擊遂大潰子壯奔高明邦彥奔三水八月清遠指揮白常燦以城迎邦彥乃入清遠與諸生朱學熙嬰城固守邦彥自起兵日一食夜則坐而假寐與其下同勞苦故軍

最強嘗分兵救諸營之敗者至是精銳盡喪外無援軍越數日城破常燦死邦彥率數十人巷戰肩受三刃不死走朱氏園見學熙縊拜哭之旋被執饋之食不食繫獄五日被戮邦彥死子壯被執踰月家玉亦自沈永明王贈邦彥兵部尚書諡忠愍廕子錦衣指揮蘇觀生者字宇霖東莞人也年三十始爲諸生崇禎中由保舉授無極知縣總督范志完薦其才進永平同知監紀軍事尋遷戶部員外郎十七年京師陷脫還南京進郎中催餉蘇州明年五月南京破走杭州會唐王李鍵至觀生謁王王與語大悅聯舟入福建與鄭芝龍鴻逵兄弟擁立王擢爲翰林學士旋進禮部右侍郎兼學士設儲賢館分十二科招四方士令觀生領之至者多庸流王亦厭

而罷其事觀生矢清操稍有文學而時望不屬王以故人恩眷出廷臣右乃超拜東閣大學士參機務觀生數贊王出師見鄭氏不足有爲且事權悉爲所握請王赴贛州經略江西湖廣王議遣觀生先行明年觀生赴贛州大徵甲兵餉不繼竟不能出師時

順治三年三月

大兵破吉安總督萬元吉乞援觀生遣二百人往元吉令協守綿津灘遇

大兵潰走元吉乃退回贛州

大兵遂圍城觀生走南康贛人數告急不敢援六月

大兵退屯水西觀生發三千人助贛守久之他將戰敗九月

大兵再攻贛州三千人皆引去時觀生移駐南安閩中急不能救聿鍵死於汀州贛州亦破觀生退入廣州監紀主事邦彥勸觀生疾趨惠潮扼漳泉兩粵可自保觀生不從會丁魁楚等將立永明王觀生欲與共事魁楚素輕之且欲專定策功慮其以舊相居已上拒不與議呂大器亦以其非兩榜叱辱之觀生愠甚適唐王第聿鏗嗣為唐王者與大學士何吾騶自閩至南海關捷先番禺梁朝鍾首倡兄終弟及議觀生遂與吾騶及布政使顧元鏡侍郎王應華曾道唯等以十一月二日擁立王就都司署為行宮即日封觀生建明伯掌兵部事進吾騶等秩擢捷先吏部尚書旋與元鏡應華道唯並拜東閣大學士分掌諸部時倉猝舉事治宮室服御鹵簿道

國奔走夜中如晝不旬日除官數千冠服皆假之優伶市人傳以為笑永明王監國肇慶遣給事中彭耀主事陳嘉謨齎敕往諭耀順德人過家拜先廟託子於友人至廣州以諸王禮見備陳天潢倫序及監國先後語甚切至因歷詆觀生諸人觀生怒執殺之嘉謨亦不屈死乃治兵日相攻以番禺人陳際泰督師與永明王總督林佳鼎戰於三水兵敗復招海盜數萬人遣大將林察將十二月二日戰海口斬佳鼎觀生意得務粉飾為太平事而委任捷先及朝鍾捷先由進士歷官監司小有才便筆札朝鍾舉於鄉善談論浹旬三遷至祭酒有楊明競者潮州人好為大言詭稱精兵滿惠潮間可十萬即特授惠潮巡撫朝鍾語人內有捷先外有明競強敵不

足平矣觀生亦器此三人事必咨之又有梁蓋者妄人也觀生才之用爲吏科都給事中與明競大納賄賂日薦用數十人觀生本乏猷略兼總內外任益昏瞽招海盜資捍禦其衆白日殺人懸肺腸於貴官之門以示威城內外大擾時

大兵已下惠潮長吏皆降附卽用其印移牒廣州報無警觀生信之是月十五日聿鏘視學百僚咸集或報

大兵已逼觀生叱之曰潮州昨尚有報安得遽至此妄言惑衆斬之如是者三

大兵已自東門入觀生始召兵搏戰兵精者皆西出倉猝不能集觀生走蓋所問計曰死爾復何言觀生入東房蓋入西房各拒戶自縊觀生慮其詐稍畱聽之蓋故扼其吭氣湧有

聲且推几仆地久之寂然觀生信爲死遂自經明日蓋獻其屍出降朝鍾聞變赴池爲鄰人救出自剄死聿鏘方事閱射急易服踰垣匿王應華家俄縋城走爲追騎所獲饋之食不受曰我若飲汝一勺水何以見先人地下投繯而絕吾騶應華等悉降

明史藁

列傳第一百五十四終

明史藁

列傳第一百五十五

光祿大夫 經筵講官明史總裁戶部尚書加七級臣王鴻緒奉

敕編撰

何騰蛟 陳象明 曠

傅作霖

瞿式耜

英

炳

何騰蛟字雲從貴州黎平衛人天啓元年舉於鄉崇禎中授南陽知縣地四達賊出沒其間數被挫去已從巡撫陳必謙破賊安臯山斬首四百餘級又討平土寇益知名遷兵部主事進員外郎出爲懷來兵備僉事調口北道才諳精敏所在見稱遭母憂巡撫劉永祚薦其賢乞奪情任事騰蛟不可固辭歸服除起淮徐兵備僉事討平土寇部內晏然十六年冬起拜右僉都御史代王聚奎巡撫湖廣時湖北地盡失止存

武昌屯左良玉大軍軍橫甚騰蛟與良玉交歡得相安明年春遣將惠登相毛憲文復德安隨州五月福王立詔至良玉駐漢陽其部下有異議不欲開讀騰蛟曰社稷安危繫此一舉倘不奉詔吾以死殉之抵良玉所而良玉已聽正紀盧鼎言開讀如禮正紀者良玉所置官名也八月福王命加騰蛟兵部右侍郎兼撫湖南代李乾德尋以故官總督湖廣四川雲南貴州廣西軍務召總督楊鶚還明年三月南京有北來太子事中外以爲真朝臣皆曰偽騰蛟力言不可殺與當國者大忤無何良玉舉兵反邀騰蛟偕行不可則盡殺城中人以劫之士民爭匿其署中騰蛟坐大門縱之入良玉破垣舉火避難者悉焚死騰蛟急解印付家人令速走將自剄爲良

玉部將擁去良玉欲與同舟不從乃置之別舟以副將四人守之舟次漢陽門乘間躍入江水四人懼誅亦赴水騰蛟漂十餘里漁舟救之起則漢前將軍關壯繆侯廟前也家人懷印者亦至相視大驚覓漁舟忽不見遠近謂騰蛟忠誠得神佑益歸心焉騰蛟乃從寧州轉瀏陽抵長沙集諸屬吏堵肩錫傳上瑞巖起恆章曠周大啓吳晉錫等痛哭盟誓分士馬舟艦糗糧各任其一令肩錫攝湖北巡撫上瑞攝湖南巡撫曠爲總督監軍大啓提督學政起恆故衡永道卽督二郡軍食晉錫以長沙推官攝榔桂道事卽遣曠調副將黃朝宣張先璧劉承胤兵朝宣自燕子窩先璧自激浦承胤自武岡先後至兵勢稍振而是時良玉已死

順治二年五月

大兵下南都唐王聿鍵自立於福州王居南陽時素知騰蛟賢委任益至李自成斃於九宮山其將劉體仁郝搖旂等以衆無主議歸騰蛟率四五萬人驟入湘陰距長沙百餘里城中人不知其來歸也懼甚朝宣卽引兵還燕子窩上瑞請騰蛟出避騰蛟曰死於左死於賊一也何避焉長沙知府周二南請往偵之以千人護行賊謂其迎敵也射殺之從行者盡死城中益懼士女悉竄騰蛟與曠謀遣部將萬大鵬等二人往撫賊見止二騎迎入演武場飲之酒二人不交一言與痛飲飲畢賊問來意荅言督師以湘陰褊小不足容大軍請卽移長沙因致騰蛟手書名之曰公等歸朝誓永保富貴搖旂

等大喜與大鵬至長沙騰蛟開誠撫慰宴飲盡歡犒從官牛酒命先璧以卒三萬馳射旂旆蔽天搖旂等大悅招其黨袁宗第葡養成王進才牛有勇皆來歸驟增兵十餘萬聲威大震未幾自成將李錦高必正擁衆數十萬逼常德騰蛟令肩錫撫降之置之荊州錦自成從子後賜名赤心必正則自成妻高氏弟也高氏語錦曰汝願爲無賴賊抑願爲大將邪錦曰何謂也曰爲賊無論旣以身許國當愛民受主將節制有死無二吾所願也錦曰諾騰蛟慮錦跋扈他日過其營請見高氏再拜執禮恭高氏悅戒其子毋忘何公錦自是無異志自成亂天下二十年陷帝都覆廟社其衆數十萬悉歸騰蛟一時詫異事而騰蛟上疏但言元兇已除稍洩神人憤宜告

謝郊廟卒不言己功唐王大喜立拜東閣大學士兼兵部尚書封定興伯仍督師而疑自成死未實騰蛟言自成定死身首已糜爛不敢居功因固辭封爵不允令規取江西及南都當是時降卒既衆騰蛟欲以舊軍參之乃題授朝宣先璧爲總兵官與承肩赤心郝永忠宗第進才及董英馬進忠馬士秀曹志建王允成盧鼎竝開鎮湖南北時所謂十三鎮者也永忠卽搖旂英騰蛟中軍志建則故巡按劉熙祚中軍餘皆良玉舊將也騰蛟銳意東下拜表出師明年正月與監軍御史李膺品先赴湘陰期大會岳州先璧逗遛諸營亦觀望獨赤心自湖北至爲

大兵所敗而還諸鎮兵遂罷騰蛟威望由此損時諸將皆驕

且貪殘朝宣尤甚劫人而剝其皮永忠效之殺民無虛日騰蛟不能制故總督楊鶚者尅餉失軍心至是復寅緣爲偏沅總督騰蛟以爲言乃召鶚還王數議出關爲鄭氏所阻騰蛟屢請幸贛協力取江西王遣使徵兵騰蛟卽發永忠精騎五千往而永忠不肯前行五月始抵郴州日鈔掠而已會

大兵破汀州聿鍵被執死贛州亦失騰蛟聞王死大慟厲兵保境如平時已聞永明王立乃稍自安王尋以騰蛟爲武英殿大學士加太子太保王進才故守益陽聞

大兵漸逼還長沙四年春進才揚言乏餉大掠并及湘陰適大兵至長沙進才走湖北騰蛟不能守單騎走衡州長沙湘陰竝失盧鼎時守衡州而先璧兵突至大掠鼎不能抗走永

州先壁遂挾騰蛟走祁陽又間道走辰州騰蛟脫還走永州甫至鼎部將復大掠鼎走道州騰蛟與侍郎嚴起恆走白牙

大兵遂下衡永初騰蛟建十三鎮以衛長沙至是皆自爲盜賊

大兵入衡州守將黃朝宣降數其罪支解之遠近大快

大清以一知府守永州副將周金湯知城內虛夜鼓譟而登知府出走金湯遂入永州六月騰蛟在白牙王密遣中使告以劉承胤罪令入武岡除之騰蛟乃走謁王王及太妃皆召見承胤由小校以騰蛟薦至大將稱門生已漸倨騰蛟在長沙徵其兵承胤大怒言先調朝宣先壁軍皆章曠親行今乃

折箠使我遂馳至黎平執騰蛟子索餉數萬子走訴騰蛟騰蛟遣曠行承胤乃以衆至騰蛟爲請於王得封定蠻伯且與爲姻承胤益驕至是爵安國公勛上柱國賜尚方劍益坐大忌騰蛟出已上欲奪其權請用爲戶部尚書專領餉務王不許王召騰蛟圖承胤騰蛟固無如承胤何也騰蛟無兵命以雲南援將趙印選胡一青兵隸之及辭朝賜銀幣命廷臣郊餞承胤伏千騎襲騰蛟印選卒力戰盡殲之騰蛟乃還駐白牙八月

大兵破武岡承胤降王走靖州又走柳州時常德寶慶已失永亦再失王將返桂林而城中止焦璉軍騰蛟率印選一青入爲助而南安侯郝永忠忽擁衆萬餘至與璉兵欲鬪會宜

章伯盧鼎兵亦至騰蛟爲調劑桂林以安乃遣璉永忠鼎印
選一青分扼興安靈川永寧義寧諸州縣十一月

大兵逼全州騰蛟督五將合禦五年正月王居桂林加騰蛟
太師進爵爲侯子孫世襲二月

大兵破全州至興安永忠兵大潰奔桂林逼王西縱兵大掠
騰蛟自永福至

大兵知桂林有變直抵北門騰蛟督璉一青等分三門拒守
大兵乃還全州會金聲桓李成棟叛

大清以兵附

大兵在湖南者姑退騰蛟遂取全州復遣保昌侯曹志建宜
章侯盧鼎新興侯焦璉新寧侯趙印選攻永州圍城三月大

小三十六戰十一月朔克之未幾監軍御史余鯤起職方主
事李甲春取寶慶諸將亦取衡州馬進忠取常德所失地多
復騰蛟議進兵長沙會督師堵胤錫惡進忠招忠貞營李赤
心軍自夔州至今進忠讓常德與之進忠大怒盡驅居民出
城焚廬舍走武岡寶慶守將王進才亦棄城走他守將皆潰
赤心等所至皆空城旋棄走東趨長沙騰蛟時駐衡州大駭
六年正月檄進忠由益陽出長沙期諸將畢會而親詣忠貞
營邀赤心入衡部下卒六千人懼忠貞營掩襲不護行止攜
吏卒三十人往將至聞其軍已東卽尾之至湘潭湘潭空城
也赤心不守而去騰蛟乃入居之
大兵知騰蛟入空城遣將徐勇引軍入勇騰蛟舊部將也率

其卒羅拜勸騰蛟降騰蛟大叱勇遂擁之去絕食七日乃殺之永明王聞之哀悼賜祭者九贈中湘王諡忠烈官其子文瑞僉都御史陳象明字麗南東莞人崇禎元年進士授戶部主事權稅淮安以清操聞屢遷饒州知府忤巡按御史被劾謫兩浙鹽運副使累遷湖南道副使唐王時總督何騰蛟令徵餉廣西會永明王立廣東地盡失象明檄調土兵與陳邦傳連營東至梧州榕樹潭遇

大兵戰敗死之廣東之失也龍門破里人廖翰標以二幼子託從父從容自縊死番禺破里人梁萬爵曰此志士盡節之秋也赴水死翰標天啓中舉人官江西新城知縣廉惠民爲建祠萬爵字天若唐王時舉人傳作霖武陵人由鄉舉仕唐

王大學士蘇觀生奏爲職方主事監紀其軍觀生歿依何騰蛟長沙改監軍御史永明王在全州超拜兵部左侍郎掌部事尋進尙書從至武岡時劉承胤擅政作霖與相善故驟遷及

大軍逼武岡承胤議迎降作霖勃然責之及承胤遣使納款大兵入城作霖冠帶坐堂上承胤力勸之降不從遂被殺妾鄭有殊色被執驅之過橋躍入水中死有周震者官中書舍人居全州慷慨尙氣節武岡失全州危震邀文武將吏盟於神誓死拒守條城守事宜上之留守瞿式耜式耜卽題爲御史監全州軍亾何郝永忠盧鼎自全州撤兵還桂林守全諸將議舉城降震力爭不可衆怒曳出斬之全州遂失又有蕭

曠者武昌諸生爲承肩坐營參將何騰蛟題爲總兵官管黎平參將事及承肩降令降將陳友龍招曠曠不從已而城破死之友龍遂盡劫騰蛟眷屬以去章曠字于野松江華亭人崇禎十年進士授沔陽知州十六年三月賊將郝搖旂陷其城同知馬騰死之曠走免謁總督袁繼咸於九江署爲監紀從諸將方國安毛憲文馬進忠王允成等復漢陽武昌巡按御史黃澍令署漢陽推官兼攝府事承德巡撫王揚基令署分巡道事明年四月憲文偕惠登相復德安揚基檄曠往守城空無人衛官十數人齎印送賊將白旺曠收斬之日夕爲警備居三月代者李藻至巡撫何騰蛟檄曠署荆西道事曠去藻失將士心城復陷給事中熊汝霖御史游有倫劾曠沔

陽失城罪候訊黃州用騰蛟薦令戴罪立功福王立南京左良玉將犯闕騰蛟至長沙以曠爲監軍副將黃朝宣者故巡撫宋一鶴部將駐燕子窩騰蛟令曠召之來副將張先璧屯精騎三千於溆浦復屬曠召之留爲親軍而以朝宣戍茶陵又令曠調劉承胤兵於武岡會李自成死其下劉體仁郝搖旂袁宗第藺養成王進才牛有勇六大部各擁數萬兵至騰蛟與曠計盡撫其衆軍容大壯左良玉死其將馬進忠王允成無所歸突至岳州偏沅巡撫傅上瑞大懼曠曰此無王之兵可撫也入其營與進忠握手指白水爲誓進忠等皆從之進忠卽賊中渠魁混十萬也時南京已破大兵逼湖南諸將皆畏怯曠獨悉力禦唐王擢爲右僉都御

史提督軍務恢勦湖北曠有智略行軍不避鋒鏑身扼湘陰平江之衝湖南恃以無恐嘗戰岳州以後軍不繼而還已又大戰大荆驛永明王加兵部右侍郎長沙守將王進才與狼兵將覃遇春鬪大掠而去騰蛟奔衡州曠亦走寶慶長沙遂失騰蛟駐祁陽曠來會騰蛟以兵事屬曠而謁王武岡曠移駐永州見諸大將擁兵聞警輒走抑鬱而卒上瑞者武定人為武昌推官賊圍城遁走久之騰蛟薦為長沙僉事又令攝偏沅巡撫事勸騰蛟設十三鎮卒為湖南大害唐王時用騰蛟薦擢右僉都御史實授偏沅巡撫性反覆棄騰蛟如遺武岡破

大兵逼沅州上瑞出降踰年與劉承胤並誅死

瞿式耜字起田常熟人禮部侍郎景淳孫湖廣參議汝說子也舉萬曆四十四年進士授吉安永豐知縣有惠政天啓元年調江陵永豐民乞留命再任以憂歸崇禎元年擢戶科給事中疏言李國楷宜留內閣王永光宜典銓曹于汴宜秉憲鄭三俊畢懋良宜總版曹李邦華宜主戎政帝多采其言俄陳朝政不平為王之案請恤孫慎行訟冤速楊鎬王化貞之誅白楊漣左光斗結毒之謗追論故相魏廣微顧秉謙馮銓黃立極之罪因言奪情建祠之朱童蒙不可寬積愆久廢之湯賓尹不可用帝亦納之又極論來宗道楊景辰附逆不可居政府二人旋罷去御史袁弘勛劾大學士劉鴻訓逆黨徐大化實王之川貴總督張鶴鳴先已被廢其復用由魏忠賢

式耜竝疏論已頌楊漣魏大中周順昌爲清中之清忠中之忠三人遂賜諡未幾陳時務七事言起廢不可不覈陞遷不可不漸會推不可不慎諡典宜嚴刑章宜飭論人宜審附瑞者宜區分又極論館選奔競之弊請臨軒親試末言古有左右史記天子言動今召對時勤宜令史官入侍紀錄昭示朝野事多議行時將定逆案請盡發紅本定其情罪輕重又言宣府巡撫徐良彥不附逆奄爲崔呈秀誣劾遣戍亟當登用良彥遂獲起式耜矯矯立名所建白多當帝意然搏擊權豪大臣多畏其口十月詔會推閣臣禮部侍郎錢謙益以同官周延儒方言事蒙眷慮竝推則已紕謀沮之式耜謙益門人也言於當事者擯延儒弗推而列謙益第二溫體仁遂發難

延儒助之謙益奪官閒任式耜坐貶謫式耜嘗頌貴寧參政胡平表殺賊功請優擢其後平表爲貴州布政使坐不謹罷式耜再貶二秩遂廢於家久之常熟奸民張漢儒希體仁指訐謙益式耜貪肆不法體仁主之下法司逮治巡撫張國維巡按路振飛交章白其冤不聽比兩人就獄則體仁已去位獄稍解謙益坐削籍式耜贖徒言官疏薦不納十七年福王立於南京八月起式耜應天府丞已擢右僉都御史代方震孺巡撫廣西明年夏甫抵梧州聞南京破靖江王亨嘉謀僭號召式耜拒不往而檄思恩參將陳邦傳助防止狼兵勿應亨嘉調亨嘉至梧劫式耜幽之桂林遣人取其敕印初式耜議立桂端王子安仁王及唐王監國式耜以爲倫序不當立

不奉表勸進至是爲亨嘉所幽乃遣使賀王因乞援王喜而亨嘉爲丁魁楚所攻勢窘乃釋式耜式耜與中軍官焦璉召邦傳共執亨嘉亂遂定唐王擢式耜兵部右侍郎協理戎政以晏日曙來代式耜不入朝退居廣東

順治三年九月

大兵破汀州式耜與魁楚等議立永明王由榔乃迎王梧州以十月十日監國肇慶進式耜吏部右侍郎東閣大學士兼掌吏部事未幾贛州敗報至司禮王坤迫王赴梧州式耜力爭不得十一月朔蘇觀生立唐王聿錡於廣州式耜乃與魁楚等定議迎王還肇慶遣總督林佳鼎禦觀生兵敗歿式耜視師峽口十二月望

大兵破廣州王坤趣王西走式耜趨赴王王已越梧而西四年正月

大兵破肇慶逼梧州巡撫曹鼐迎降王欲走依何騰蛟於湖廣丁魁楚呂大器王化澄皆棄王去止式耜及吳炳吳貞毓等從乃由平樂抵桂林二月

大兵襲平樂分兵趨桂林王將走全州式耜極陳桂林形勢請留不許自請留守許之進文淵閣大學士兼兵部尙書賜劍便宜從事平樂潯州相繼破桂林危甚總督侍郎朱盛濃走靈川巡按御史辜延泰走融縣布政使朱盛瀾副使楊乖雲桂林知府王惠卿以下皆遁惟式耜與通判鄭國藩縣丞李世榮及都司林應昌李當瑞沈煌在焉王令兵部右侍郎

丁元晷代盛濃御史魯可藻代延泰未赴而

大兵已於三月薄桂林以騎數十突入文昌門登城樓瞰式
耜公署式耜急令援將焦璉拒戰初永明王爲賊執璉率衆
攀城上破械出之王病不能行璉負王以行王以此德璉用
破靖江王功命爲參將及是戰守三月璉功最多元晷可藻
亦盡力式耜身立矢石中與士卒同甘苦積雨城壞吏士無
人色式耜督城守自如故人無叛志援兵索餉而譁式耜括
庫不足妻邵捐簪珥佐之旣而璉兵主客不和諫而去城幾
破者數矣會陳邦彥等攻廣州

大兵引而東桂林獲全璉

陽朔及平樂陳邦傳亦由潯

復梧州王聞捷封式耜

是新興伯元晷等進秩有差

式耜初請王返全州不聽已請還桂林王已許之會武岡破

王由靖州走柳州式耜復請還桂林十一月

大兵自湖南逼全州式耜偕騰蛟拒却已梧州復破王方在
象州欲走南寧以大臣力爭乃以十二月還桂林五年二月
南安侯郝永忠駐桂林惡城外圍練兵盡破水東十八村殺
戮無算與式耜構難式耜力調劑永忠乃駐興安

大兵前驅至靈川永忠戰敗奔入桂林請王卽夕西走式耜
力爭不聽左右皆請速駕式耜又爭王曰卿不過欲予死社
稷爾式耜爲泣下沾衣王甫行永忠卽大掠捶殺太常卿黃
太元式耜家亦被掠家人矯騰蛟令箭乃出城日中趙印選
諸營自靈川至亦大掠城內外如洗永忠走柳州印選等走

永寧明日式耜息城中餘燼安撫遠近焦璉及諸鎮周金湯
兆佐胡一青等各率所部至騰蛟軍亦至三月

大兵知桂林有變來襲抵北門騰蛟督諸將拒戰城獲全時
王駐南寧式耜遣使慰三宮起居王始知式耜無恙爲泣下
閏三月廣東李成棟江西金聲桓皆叛

大清據地歸式耜請王還桂林王從成棟請將赴廣州式耜
慮成棟挾王自專如劉承胤事力爭之乃駐肇慶十一月永
州寶慶衡州竝復式耜以機會可乘請王還桂林圖出楚之
計不納慶國公陳邦傳守潯州自稱世守廣西欲如黔國公
例式耜特疏劾之會中外多爭者邦傳乃止廣西巡撫魯可
藻自署銜巡撫兩廣式耜亦疏駁之式耜身在外政有關必

疏諫嘗曰臣與主上患難相隨休戚與共不同他臣一切大
政自得與聞王爲褒納而是時成棟子元胤專朝政知敬式
耜袁彭年丁時魁金堡等遂爭相倚附六年正月時魁等逐
朱天麟不欲何吾騶爲首輔召式耜入直以文淵印畀之式
耜終不入也未幾騰蛟聲桓成棟相繼敗歿國勢大危朝士
方植黨相角式耜不能禁七年正月南雄破王懼走梧州諸
大臣訐時魁等下獄式耜七疏論救胡執恭之擅封孫可望
也式耜疏請斬之皆不納九月全州破開國公趙印遷居桂
林衛國公胡一青守榕江與寧遠伯王永祚皆懼不出兵
大兵遂入嚴關十月一青永祚入桂林分餉榕江無戍兵
大兵益深入十一月五日式耜檄印選出不肯行再趣之則

盡室逃一青及武陵侯楊國棟綏寧伯蒲縷寧武伯馬養麟亦逃去永祚迎降城中無一兵式耜端坐府中家人亦散部將戚良勛請式耜上馬速走式耜堅不聽叱退之俄總督張同敞至誓偕死乃相對飲酒一老兵侍召中軍徐高付以敕印屬馳送王是夕兩人秉燭危坐黎明數騎至式耜曰吾兩人待死久矣遂與偕行至則踞坐於地諭之降不聽幽於民舍兩人日賦詩倡和得百餘首至閏十一月十有七日將就刑從容肅衣冠南向拜訖與同敞竝死同敞大學士居正孫事見居正傳吳炳宜興人萬曆末進士授蒲圻知縣崇禎中歷官江西提學副使江西地盡失流寓廣東永明王擢爲兵部右侍郎從至桂林令以本官兼東閣大學士仍掌部事又

從至武岡

大兵至王倉猝奔靖州令炳扈王世子走城步吏部主事侯偉時從之既至城已爲

大兵所據遂被執送衡州炳不食自盡於湘山寺偉時亦死之偉時公安人崇禎中進士歷官吏部考功主事罷歸至是補官數月卽遘難

明史藁

列傳第一百五十五終

魏忠賢將建祠涇陽振飛執不從邑人張問達忤奄坐追贓

路振飛字見白曲周人天啓五年進士除涇陽知縣大吏諂

高 勤薛大觀 高那高

文安之 楊畏知 王錫袞

朱天麟 張孝起 吳貞毓

呂大器 堵胤錫 嚴起恒

錢肅樂 沈宸荃 樊一蘅范文光 詹天顏

路振飛 何楷 熊汝霖

光祿大夫 經筵講官明史總裁戶部尚書加七級臣王鴻緒奉

敕編撰

明史藁

列傳第一百五十六

敬慎堂

十萬振飛故遷延奄敗事解流賊入境擊却之崇禎四年徵授御史疏劾首輔周延儒卑汙奸險黨邪醜正啓宵小奔競之門短豪傑敢言之氣祈立斥以清揆路被旨切責未幾陳時事十大弊曰務苛細而忘政體喪廉恥而壞官方民愈窮而賦愈亟有事急而無事緩知顯患而忘隱憂求治事而鮮治人責外重而責內輕嚴於小而寬於大臣日偷而主日疑有詔旨而無奉行其言深切時政帝但付所司而已山東兵叛劾巡撫余大成孫元化且論延儒曲庇之罪帝不問已劾吏部尚書閔洪學結權勢樹私人秉銓以來吏治日壞洪學疏辨振飛復力駁之乃自引去侍郎劉宇烈勦山東叛將無功振飛劾罪之廷推南京吏部尚書謝陞爲左都御史振飛

歷詆其醜狀陞遂不果用六年巡按福建海賊劉香數勾紅夷入犯振飛懸千金勵將士於是游擊鄭芝龍等大破之詔賜銀幣俸滿以京卿錄用初振飛論海賊情形謂巡撫鄒維璉不能辨語侵之維璉罷去命甫下數奏捷振飛乃力暴其功維璉後復召用振飛俄上疏請暫止錢穀刑名之奏深思安危治亂之幾時御文華召輔臣問九卿賢否武臣問樞部臺諫問憲臣薦揚者立狀保結與同功罪帝以立狀非典制不從八年夏帝將簡輔臣振飛言枚卜盛典使夤緣者竊附則不光如向者周延儒溫體仁等公論俱棄宅揆以後民窮盜興辱已者必不能正天下時延儒已斥而體仁方居首揆大限已而振飛按蘇松請除輸布收銀白糧收兌四大惠民

因以蘇會常熟奸民張漢儒訐鄉官錢謙益瞿式耜體仁坐
振飛失糾擬旨令陳狀振飛白謙益無罪語刺體仁體仁益
恚激帝怒謫河南按察司檢校入爲上林丞屢遷光祿少卿
十六年秋擢右僉都御史總督漕運巡撫淮揚明年正月流
賊陷山西振飛遣將金聲桓等十七人分道防河由徐泗宿
遷至安東沐陽且團練鄉兵犒以牛酒得兩淮間勁卒數萬
福周潞崇四王避賊同日抵淮大將劉澤清高傑等亦棄汎
地南下振飛悉延接之四月初聞北都陷福王立於南京河
南副使呂弼周爲賊節度使來代振飛進士武愷爲賊防禦
使招撫徐沛而賊將董學禮據宿遷振飛擊禽弼周愷走學
禮竿弼周法場命軍士人射三矢乃解磔之縛愷尙諸市鞭

八十檻車獻諸朝後伏誅三月馬士英欲用所親田仰乃罷
振飛令仰代振飛亦遭母喪家無可歸流寓蘇州尋錄功卽
家加右副都御史振飛初督漕謁鳳陽皇陵望氣者言高牆
有天子氣唐王聿鍵方以罪錮守陵中官虐之振飛捕治其
尤甚者而上疏乞槩寬罪宗竟得請楊維垣謫戍淮安振飛
待之薄及是起用事喉撫寧侯朱國弼劾振飛不迎駕入淮
城而私語鳳陽有天子氣懷二心行人朱統顛復詆之以旣
解官獲免

順治二年大兵破南京聿鍵自立於福州拜爲左都御史募
能致振飛者官五品賜二千金振飛乃赴召道拜太子太保
吏部尚書兼文淵閣大學士至則大喜與宴抵夜分撤燭送

歸解玉帶賜之官一子職方員外郎又錄守淮功蔭錦衣世千戶王每責廷臣怠玩振飛因進曰上謂臣僚不改因循必致敗臣謂上不改操切亦未必能中興也上有愛民之心而未見愛民之政有聽言之明而未收聽言之效喜怒輕發號令屢更見羣臣庸下而過於督責因博覽書史而務求明備凡上所長者皆臣所甚憂也其言曲中王短云三年大兵進仙霞關聿鍵走汀州振飛追赴不能及汀州破振飛走居海島明年赴永明王召卒於途

鳳陽燬皇陵楷劾巡撫楊一鵬巡按吳振纓罪而未刺輔臣溫體仁王應熊已又言振纓乃體仁私人一鵬則應熊座主也逆賊犯皇陵神人共憤陛下輟講避殿感動臣民二輔臣乃漫然視之欲令一鵬振纓戴罪自贖情面重祖宗陵寢爲輕朋比深天下譏刺不恤臣所以憤發於中言不能已忤旨鑄大秩視事又言應熊體仁奏辨明白引門生姻婭刑官瞻徇實由於此乞宣諭輔臣毋分別恩仇以國事爲戲應熊復奏辨楷言臣疏未奉旨應熊先一日撫引臣疏詞必有漏禁中語者帝意動令應熊自陳應熊竟田是去登萊巡撫陳應元引疾吏部尚書謝陞言登萊要地宜允其去及推勞永嘉代應元則言登萊巡撫本贅員宣大缺總督兵部侍郎史承

安虞廷推及已遽託疾楷皆疏駁之楷以訟獄繁與列上定
新例行久任酌分理重會審嚴斃獄革羈舖飭聲冤究造謗
八議言最詳析給事中陳啓新言初任時循例謁嘉定伯而
南京給事中曹景參則疏頌溫體仁請召還政府楷言啓新
所循何例將大啓奔競風景參拜疏時體仁尚未允放何以
豫知其必去先請召還上言大臣德政當按律治罪都御史
高攀龍當給贈官誥以許士柔撰文獲罪停不給楷以爲言
并請賜左光斗諸臣諡召還惠世揚疏多見聽屢遷工科都
給事中十一年五月帝以火星逆行減膳修省兵部尚書楊
嗣昌方主款議因歷引前史以進楷與南京御史林蘭友先
後言其非楷言嗣昌引建武款塞事欲借以申市賞之說引

元和用興事欲借以申招撫之說引太平興國連年兵敗事
欲借以申不可用兵之說徒巧附會耳至永平二年馬皇后
事更不知指斥安在帝方護嗣昌不聽踰月嗣昌柄政楷又
言嗣昌奪情入閣自請服素衣角帶及視事吉服爛然立諸
輔首臣恐天下士民有以窺輔臣淺深也忤旨貶二秩爲南
京國子監丞就遷禮部郎中母憂歸服闋廷臣交薦至十七
年正月召令入京甫聞命都城已陷楷至南京福王用王鐸
薦超擢戶部右侍郎督理錢法命兼工部右侍郎連疏請告
不許

順治二年南都破楷走杭州從唐王入閩擢戶部尚書鄭芝
龍鴻逵兄弟橫甚郊天時稱疾不出楷言禮莫大於郊二勛

臣不陪祀無人臣禮王獎其風節命掌都察院事鴻達扇殿上楷呵止之兩人益怒楷知不爲所容連請告去途遇盜截其一耳芝龍使部將楊耿爲之也後漳州破抑鬱而卒楷博綜羣書寒暑勿輟尤邃於經學林蘭友字翰荃仙游人崇禎四年進士授臨桂知縣擢南京御史疏劾大學士張至發薛國觀吏部尚書田惟嘉等因論嗣昌忠孝兩虧貶浙江按察司照磨與楷及黃道周劉同升趙士春稱長安五諫遷光祿署丞京師陷雍髮自匿爲賊所執拷掠備至賊敗南還唐王用爲太僕少卿遷僉都御史事敗挈家遁海隅十餘年卒熊汝霖字雨殷餘姚人崇禎四年進士授同安知縣擢戶科給事中疏陳用將之失言曰偏裨至副將歷任有功方可授

節鉞此選將法也今足未履行陣幕府已上首功胥吏提虎旅統袴子握兵符何由奮敵愾若大將之選宜召副將有功者時賜面對擇才者用之廷臣推擇有悞宜用文吏保舉連坐法帝納其言已論天下諸督撫得失下所司核議尋言楊嗣昌未罪虛象昇未褒殊挫忠義氣至爲嗣昌畫練餉之策驅中原萬姓爲盜者原任給事中沈迅爲嗣昌運籌以三千人駐襄陽城破輒走者監紀主事余爵爲嗣昌援引遭襄藩之陷重賂陳新甲嫁禍鄖撫袁繼咸者今解任候代之宋一鶴皆悞國宜罪京師戒嚴汝霖分守東直門嘗召對言將不任戰敵南北往返謹隨其後如厮隸之於貴官負弩前驅望塵靡及何名爲將何名爲督師帝深然之已言有司察處者

不得濫舉邊才監司察處者不得遽躡巡撫庶封疆重任不
爲匪人借途又言自戒嚴以來臣疏凡二十上援勦機宜百
不行一而所揣敵情不幸言中矣比者外縣難民紛紛入都
皆云避兵不云避敵霸州之破敵不多殺掠官軍繼之始無
子遺朝廷歲費數百萬金錢以養兵豈欲毒我赤子帝惡其
中有飲泣地下語謫爲福建按察司照磨福王立召還上疏
言臣自丹陽來知浙兵爲邊兵所擊火民居十餘里邊帥有
言四鎮以殺掠獲封爵我何憚不爲臣意四鎮必毅然北征
一雪此恥今戀戀淮揚何也況一鎮之餉多至六十萬勢必
不能供卽倣古藩鎮法亦當在大河以北開屯設府曾與竇
之內遽以藩籬視之頃之言臣竊觀目前大勢無論恢復未

能卽偏安尚未可必宜日討究兵餉戰守乃專在恩怨異同
勲臣方鎮舌鋒筆鏑是遲近且以匿名帖逐舊臣以疏遠宗
人劾宰輔中外紛紛謂將復厥衛夫厥衛樹威牟利小民雞
犬無寧日先帝止此一節未免府怨前事不遠後事之師且
先帝篤念宗藩而聞寇先逃誰死社稷先帝隆重武臣而叛
降跋扈肩背相踵先帝委任勲臣而京營銳卒徒爲寇藉先
帝倚任內臣而開門延敵衆口喧傳先帝不次擢用文臣而
邊才督撫誰爲捍禦超遷宰執羅拜賊庭知前日之所以失
卽知今日之所以得及今不爲將待何時疏奏停俸尋補吏
科右給事中初馬士英薦阮大鍼汝霖爭不可及大鍼起佐
兵部汝霖又言大鍼以知兵用當置有用地不宜處中朝不

聽踰月以奉使陛辭言朝端議論日新官府揣摩日熟自少
宰樞貳悉廢廷推四品監司竟晉詹尹蹊徑疊出謠詠繁興
一人未用便目滿朝爲黨人一官外遷輒訾當事爲可殺市
井狡獪耽耽得官置國恤於罔聞逞私圖而得志黃白充庭
青紫塞路六朝佳麗復見今時獨不思他日稅駕何地邪不
報未幾南京破士英竄杭州汝霖責其棄主士英無以荅杭
州亦破與孫嘉績同起兵魯王監國擢右僉都御史督師防
江戰屢敗入海寧募兵萬人進兵部右侍郎唐王立閩中遣
劉中藻頒詔汝霖出檄嚴拒之

順治三年魯王監國進兵部尚書從王泛海明年以本官兼
東閣大學士又明年春鄭彩憾汝霖遣兵潛害之并其幼子

投海中

錢肅樂字希聲鄞縣人臨江知府若賡孫寧國知府敬忠兒
子也崇禎十年成進士授太倉知州豪家奴與黠吏爲奸而
兇徒結黨殺人焚其屍肅樂痛懲皆斂手又以朱白榜列善
惡人名械白榜者階下予大杖久之杖者日少嘗攝崑山崇
明事兩縣民皆立碑頌德遷刑部員外郎尋丁內外艱

順治二年大兵取杭州屬郡多迎降閏六月寧波鄉官議納
款肅樂力言當舉兵拒諸生華夏董志寧等遮拜肅樂大呼
倡首士民集者數萬人肅樂乃建牙行事郡中監司守令皆
逃惟一同知治府事已齋圖籍迎降聞兵起叩首請罪肅樂
索取倉庫籍繕完守具會總兵王之仁旣納款而悔入城與

肅樂締盟共守肅樂聞魯王在台州遣舉人張煌言奉表請
監國會紹興餘姚亦舉兵王乃赴紹興行監國事召肅樂爲
右僉都御史畫錢塘而守尋進右副都御史當是時之仁及
大將方國安竝加封爵其兵食用寧波紹興台州三郡田賦
而肅樂兵資富室助餉不能繼恆缺食已加兵部右侍郎明
年五月軍食盡悉散去魯王航海肅樂亦之舟山唐王召之
甫入境王已歿遂退隱海壇山採山薯爲食明年魯王次長
垣召爲兵部尚書薦用劉沂春吳鍾巒等明年拜肅樂東閣
大學士唐王雖歿而其將涂登華爲守福寧魯王遣大學士
劉中藻攻之登華欲降疑未決曰海上豈有天子舟中豈有
國公肅樂致書將軍獨不聞南宋之末二帝竝在海上張陸

竝在舟中乎登華遂降鄭彩專柄連殺熊汝霖鄭遵謙肅樂
憂憤卒於舟故相葉向高曾孫進晟葬之福清黃蘗山中藻
福安人由進士官行人賊陷京師薙髮被擄掠賊敗南還事
唐王旣事魯王攻降福寧守之移駐福安

大兵破城冠帶坐堂上爲文自祭吞金屑死遵謙會稽人爲
諸生無賴其妻殺人推官陳子龍論遵謙死用許都言免之
後都作亂遵謙將往從叔扇其室而止久之潞王以杭州降
大清遵謙倡衆起兵事魯王崎嶇浙閩間從王航海與汝霖
竝爲彩害

沈宸荃慈谿人崇禎十三年進士授行人奉使旋里福王時
復命擢御史疏陳五事皆切時病已論羣臣醜正黨邪請王

臥薪嘗膽報君父大讐且言西北風塵尙有東南託足倘東南復烽火更稅駕何地因以節儉之說進尋薦詞臣黃道周劉同升葛世俊徐汧吳偉業等又言今經略山東河南者王永吉張縉彥也王永吉失機先帝拔爲總督擁兵近甸不救國危縉彥官部曹先帝驟擢典中樞乃率先從賊卽加二人極刑不爲過陛下屈法用之而王永吉觀望逗遛縉彥狼狽南竄死何以對先帝生何以對陛下昌平巡撫何謙失陷諸陵罪亦當按至都城旣陷先帝賓天守土臣皆宜礪兵秣馬俟新君復讐賊塵未揚顧先去爲民望如河道總督黃希憲山東巡撫丘祖德尙可容偃臥家園乎疏入謙祖德及登萊巡撫曾化龍皆命逮治王永吉縉彥不罪俄陳禦敵實策下所司議

行時朝政大亂宸荃獨持正要人多疾之明年以年例出爲蘇松兵備僉事未赴南都破宸荃舉兵邑中魯王監國擢右僉都御史已而事敗宸荃棄家從王海外王次長垣連擢至大學士從王於舟山又從泛海抵廈門金門後檣舟南日山遭風沒於海宸荃邑子沈履祥嘗爲知縣監國時以御史督餉台州城破避山中被獲死之

樊一蘅字君帶宜賓人父垣常德知府一蘅舉萬曆四十七年進士知安義襄陽累官吏部郎中請告歸崇禎三年秋遷榆林兵備參議流賊多榆林人又久荒飢民益相挺爲盜一蘅撫創殘修戎備討斬申在庭馬丙貴平不沾泥累被薦遷監軍副使再遷右參政分巡關南總兵曹文詔敗歿羣賊迫

西安總督洪承疇令一蘅監左光先張應昌軍連破賊擊走混天星賊逼漢中瑞王告急一蘅偕副將羅尚文往救會承疇大軍至賊乃走進按察使偕副將馬科賀人龍屢挫祁總管於漢中降之十二年擢右僉都御史代鄭崇儉巡撫寧夏被劾罷歸十六年冬用薦起兵部右侍郎總督川陝軍務道阻命不達

順治元年福王立於南京復申前命時張獻忠已據全蜀惟遵義未陷一蘅與王應熊避其地既拜命檄諸郡舊將會師大舉會巡撫馬乾復重慶松潘副將朱化龍同知詹天顏擊斬賊將王運行復龍安茂州一蘅乃起舊將甘良臣爲總統副以侯天錫屠龍合參將楊展遊擊馬應試余朝宗所攜潰

卒得三萬人明年三月攻敘州應試朝宗先登展等繼至斬馘數千級僞都督張化龍走遂復其城一蘅乃犒師江上初乾復重慶賊將劉廷舉走求救於獻忠獻忠命養子劉文秀攻重慶水陸竝進副將曹英與參政劉鱗長自尊義至與部將于大海李占春張天相等夾擊破賊兵數萬英威名大振諸別將皆屬兵二十餘萬奉一蘅節制楊展既復敘州賊將馮雙禮來寇每戰輒敗孫可望以大衆援之隔江持一月糧盡一蘅退屯古蘭州展退屯江津賊乃截朱化龍及僉事蔡肱明於羊子嶺化龍率番騎數百衝賊兵賊驚潰死者滿山谷化龍以軍孤還守舊地他將復連敗賊於摩泥滴水一蘅乃命展應試取嘉定邛眉故總兵官賈聯登及其中軍楊維

棟取資簡天錫高明佐取瀘州占春大海守忠涪其他據城
邑奉征調者洪雅則曹勛及監軍副使范文光松茂則監軍
僉事詹天顏夔萬則譚弘譚詣一蘅乃移駐納溪居中調度
與督師應熊會瀘州檄諸路刻期並進獻忠頗懼盡屠境內
民沈金銀江中大焚宮室火連月不滅將棄成都走川北明
年春展盡取上川南地屯嘉定與勛等相聲援而應熊及王
祥在遵義乾英在重慶皆宿重兵賊勢日蹙惟保寧順慶爲
賊將劉進忠所守進忠又數敗獻忠怒遣孫可望劉文秀王
尚禮狄三品王復臣等攻川南郡縣應熊一蘅急令展天錫
龍應試及顧存志莫宗文張登貴連營犍爲敘州以禦之賊
連戰不利英祥乘間趨成都獻忠立召可望等還又聞

大兵入蜀境劉進忠降大懼七月棄成都走順慶尋入西充
之鳳凰山至十二月

大兵奄至射殺獻忠賊降及敗死者二三十萬可望等率殘
卒南奔驟至重慶英出不意戰敗死於江賊遂陷綦江應熊
避之畢節衛踰月賊陷遵義入貴州

大兵追至重慶巡撫乾敗死遂入遵義以餉乏旋師王祥等
復取保寧二郡一蘅再駐江上爲收復全蜀計乃列上善後
事宜及諸將功狀於永明王拜一蘅戶兵二部尚書加太子
太傅祥展天錫等進爵有差時應熊已卒而宗室朱容藩故
偏沅巡撫李乾德竝以總制至楊喬然江爾文以巡撫至各
自署置官多於民諸將袁韜據重慶于大海據雲陽李占春

據涪州譚詣據巫山譚文據萬縣譚弘據天字城侯天錫據永寧馬應試據蘆衛王祥據遵義楊展據嘉定朱化龍曹勛仍據故地搖黃諸家據夔州夾江兩岸而李自成餘孽李赤心等十三家亦在建始縣一衛令不行保敘州一郡而已順治五年容藩自稱楚世子建行臺夔州稱制封拜時喬然已進總督而范文光督天顏巡撫川南北呂大器文安之復以大學士來督師皆惡容藩謀誅之六年春容藩遂爲占春所敗走死雲陽初展與祥有隙遣子璟新攻之璟新先襲殺應試與祥戰敗歸乾德利展富說韜及武大定殺展分其贖一衛誚乾德諸鎮亦皆憤有離心秋孫可望遣白文選攻殺祥降其衆二十餘萬盡得遵義重慶一衛益孤七年秋可望

又使劉文秀大敗武大定兵長驅至嘉定大定韜皆降乾德投水死文秀兵復東譚弘譚詣譚文盡降占春大海降於大清明年正月文秀還雲南留文選守嘉定劉鎮國守雅州三月

大兵南征文選鎮國挾曹勛走文光天顏化龍相繼死一衛時已謝事避山中至九月亦遭疾死文武將吏盡亾文光內江人天啓初舉於鄉崇禎中歷官工部主事南京戶部員外郎告歸十七年張獻忠亂蜀文光偕邛州舉人劉道貞蘆山舉人程翔鳳雅州諸生傅元修洪其仁等舉義兵奉鎮國將軍朱平櫟爲蜀王推黎州參將曹勛爲副總兵統諸將而文光以副使爲監軍道貞等授官有差勛敗賊雅州龍鶴山追

至城下反爲所敗退守小關山十一月文光督參將黎神武攻雅州不克明年九月神武合雅州土漢兵再擊賊將艾能奇於雅州敗績僞監司郝孟旋守縣州文光翔鳳遣間使招之孟旋襲殺守雅州賊以城來歸文光等入居之獻忠死文光保境如故永明王命爲右僉都御史巡撫川南而以安縣道詹天顏巡撫川北總督李乾德殺楊展文光惡之遂入山不視事

大兵克嘉定文光賦詩一章仰藥死天顏兵敗被執亦死之天顏龍巖人起家選貢生

呂大器字儼若遂寧人崇禎元年進士授行人擢吏部稽勳主事更歷四司乞假歸以邑庠惡倡議修築工甫竣賊至佐

有司拒守城獲全詔增秩一等出爲關南道參議遷固原副使巡撫丁啓睿檄大器討長武賊用穴地火攻法滅之尋遷湖廣參政以陝西撫按請留命還任十四年擢右僉都御史巡撫甘肅總兵官柴時華賄先任巡撫劉錡因而脅持之錡坐去官憤死大器劾時華諸不法事解其職立遣副將王世寵代之時華欲爲變乞兵西部及土魯番其使爲邏卒所獲大器令世寵討敗時華及西部時華自焚死塞外爾迭尼黃台吉等擁衆乞賞謀犯肅州守臣拒走之而假賞犒名毒飲馬泉殺其衆無算大器以此獲敘賚羣番爲亂遣總兵官馬爌督副將世寵等斬首七百餘級撫三十八族而還又擊敗其餘黨西陲略定十五年六月擢兵部添注右侍郎大器負

才性剛躁善遊事見天下多故懼當軍旅任力辭五不堪四不可且投揭吏科言已好酒色財必不可用給事中馬嘉植方士亮交劾之且詆爲陳新甲私人帝趣令入京詭稱疾不至嚴旨切責亦不至給事中郝綱劾其偃臥丘園不知有君國乃命所司察奏明年三月始至命以本官兼右僉都御史總督保定山東河北軍務大器疏辭且辯非新甲黨給事中龔鼎孳御史王燮復劾之帝爲鑄二人秩時畿輔未解嚴大器及諸將和應薦張汝行馳扼順義牛欄山總督趙光抃集諸鎮師大戰羅山調應薦汝行往應薦陣亡他將亦多敗大器所部無失事增俸一等五月以保定息警罷總督官特設江西湖廣應天安慶總督駐九江大器任之湖北地已失武

昌亦陷左良玉駐九江稱疾不進疑大器圖已大器詣榻前與慰勞疑稍釋而張獻忠大躡河南分兵陷袁州吉安大器亟遣部將謝騰雲李士元及良玉將吳學禮馬進忠連破之樟樹鎮峽江永新二郡皆復已而建昌撫州陷良玉大器不和兵私鬪焚南昌關廂廷議恐壞疆事收大器南京兵部右侍郎以袁繼咸代十七年四月尚書史可法聞賊犯京師督兵入衛方抵江浦都城報陷南京諸大臣議所立大器時掌禮兵二部事入錢謙益雷縝祚等言王立潞王議未定而馬士英已與諸將劉澤清等擁福王至及王立遷大器吏部左侍郎遂以異議絀恆自危六月上疏力攻士英言其擁兵入朝覲留政地翻先皇手定逆案欲躋阮大鍼中樞其子以銅

臭爲都督女弟之夫未履行陣授總戎姻婭越其杰田仰楊文驄皆先朝罪人盡登膺仕亂名器夫吳姓鄭三俊臣不謂無一事失而端方諒直終爲海內正人之歸士英大鉞臣不謂無一技長而奸回邪慝終爲宗社無窮之禍疏入勗以和衷體國而已不能用也未幾澤清入朝劾大器及續祚心懷異圖大器遂乞休去慮後禍以手書監國告廟文送內閣然士英憾未已令太常少卿李沾劾之遂削籍超擢沾左都御史復命法司逮治大器以蜀地盡失無可蹤跡而止而謙益附士英大鉞得爲禮部尚書獨續祚論死明年唐王召爲兵部尚書兼東閣大學士道梗久之至汀州失奔廣東與丁魁楚等擁永明王監國令以原官兼掌兵部事久之進少傅盡

督西南諸軍代王應熊賜劔使宜從事至涪州與將軍李占春深相結他將楊展于大海胡雲鳳袁韜武大定譚弘譚詣譚文皆受約束會宗室朱容藩自稱天下兵馬副元帥大器檄占春大海雲鳳討殺容藩大器至思南得疾次都勻而卒王謚爲文肅

堵胤錫字仲緘無錫人崇禎十年進士除南京戶部主事進郎中遷長沙知府山賊掠安化寧鄉數敗官軍胤錫督鄉兵破滅之又殺醴陵賊魁遂以知兵名十六年八月賊陷長沙胤錫朝覲還賊已退明年六月福王命爲湖廣參政分守武昌黃州漢陽左良玉稱兵總督何騰蛟奔長沙令胤錫攝湖北巡撫事駐常德唐王立拜右副都御史實授巡撫李自成

死衆推其兄子錦爲主奉自成妻高氏及高氏弟一功驟至
澧州言欲乞降衆號三十萬遠近大震肩錫議撫之騰蛟亦
馳檄至乃躬入其營開誠慰諭稱詔賜高氏命服錦一功蟒
王金銀器犒其軍皆踴躍拜謝乃卽軍中宴之導以忠孝夫
義數千言明日高氏出拜謂錦曰堵公天人也汝不可負別
部田見秀劉汝魁等亦來歸唐王大喜加兵部右侍郎兼右
僉都御史總制其軍手書獎勞授錦御營前部左軍一功右
軍竝挂龍虎將軍印封列侯賜錦名赤心一功名必正他部
帥封賞有差號其營曰忠貞封高氏貞義夫人賜珠冠綵幣
命有司建坊題曰淑贊中興嘉獎甚至肩錫遂與赤心等深
相結倚以自強然赤心書疏猶稱自成先帝高氏太后肩錫

不能止也已而袁宗第劉體仁諸營先歸騰蛟者亦引與赤
心合衆益盛肩錫以芻糧難繼令散處江北就食明年正月
騰蛟大舉期諸軍盡會岳州獨赤心先至餘皆逗遛卒不能
進永明王立進肩錫兵部尚書總制如故

順治四年永明王令赤心等攻荊州月餘
大兵援荊州赤心等大敗步走入蜀數日不得食乃散入施
州衛聲言就食湖南時王在武岡劉承胤懼爲赤心所并計
非肩錫不能禦乃加東閣大學士封光化伯賜劍便宜從事
肩錫疏請得給空敕鑄印願賜秦中舉兵者時頗議其專承
胤欲殺騰蛟胤錫劾其罪八月

大兵破武岡及寶慶常德辰沅胤錫走永順土司尋赴貴陽

抵遵義乞師於皮熊王祥又入施州請忠貞營軍會楚宗人朱容藩偽稱監國天下兵馬副元帥擅居夔州御史錢邦芭傳檄討之五年正月肩錫見容藩責以大義曉譬利害散其黨未幾金聲桓李成棟叛我

大清以江西廣東附永明王於是馬進忠王進才曹志建李赤心高必正等乘間取常德桃源澧州臨武藍山道州靖州荆門宜城諸州縣進忠赤心必正皆封公肩錫與進忠有隙令赤心必正爭進忠所取常德進忠盡焚廬舍而去赤心等棄空城引而東所至守將皆燒營棄城走湖南已復州縣爲一空肩錫乃率赤心等入湘潭與騰蛟會騰蛟令肩錫向江西而自率進忠等向長沙六年正月兵方逼長沙騰蛟在湘

潭被執諸軍遂散赤心等走廣西緣道掠衡永郴桂肩錫與胡一青守衡州戰敗走桂陽初赤心等入廣西龍虎關守將曹志建惡其淫掠并惡肩錫肩錫不知也或說志建肩錫將召忠貞營圖志建夜發兵圍肩錫殺從卒千餘肩錫及子逃入富川徭峒志建索之急徭潛送肩錫於監軍僉事何圖復聞關達梧州會王遣大臣嚴起恆劉湘客安輯忠貞營至梧而赤心等已走賓橫二州乃載肩錫謁王於肇慶志建遷怒圖復誘殺之闔門俱盡肩錫至肇慶時馬吉翔及李元肩袁彭年等皆專柄各樹黨肩錫乃結歡於吉翔激赤心等東來與元肩爲難移書瞿式耜欲聞元肩託言王有密敕令已與式耜圖元肩王頗不悅元肩黨丁時魁金堡又論其喪

師失地乃令總統兵馬移駐梧州肩錫以赤心等不足恃欲
遙結孫可望為強援矯王命封為平遠王肩錫尋至潯州自
恨發病十一月卒王贈為潯國公諡文忠

嚴起恆浙江山陰人崇禎四年進士除刑部主事歷員外郎
升廣州知府遷衡永兵備副使民懷其德閉城不使去上官
慰諭乃得行十六年張獻忠躡湖南吏民悉遁竄起恆獨堅
守永州賊亦不至左良玉犯闕總督何騰蛟奔長沙集僚屬
盟誓起恆與焉唐王時擢戶部右侍郎總督湖南錢法永明
王立令兼督湖南軍餉

順治四年永明王駐武岡拜起恆禮部尚書兼東閣大學士
仍領錢法王走靖州起恆從不及避難萬村已知王在柳州
間道往從之畱守大學士瞿式耜請王返桂林起恆亦從之
復從至柳州南寧李成棟反

大清以廣東附於王起恆乃從王至肇慶與王化澄朱天麟
同入直時朝政決於成棟子元肩都御史袁彭年少詹事劉
湘客給事中丁時魁金堡蒙正發五人附之攬權植黨人目
為五虎起恆居其間不能有所匡正已而化澄天麟相繼罷
舊輔何吾騶黃士俊入未幾吾騶罷士俊為首輔起恆次之
起恆潔廉遇事持平與文安侯馬吉翔司禮中官龐天壽共
患難久無所忤而五虎憾起恆競詆為邪黨王在梧州尚書
吳貞毓等十四人合疏攻五虎下湘客等獄欲寘之死起恆
顧跪王舟力救貞毓等并惡之乃請名還化澄而合攻起恆

給事中雷德復劾其二十餘罪比之嚴嵩王不悅奪德復官起恆力求罷王輒留之不得放舟竟去會鄖國公高必正入朝貞毓欲藉其力以傾起恆言朝事壞於五虎王之者起恆也公入見請除君側奸數言決矣必正許之有爲起恆解者謂必正曰五虎攻嚴公嚴公反力救五虎此長者奈何以爲奸必正見王乃力言起恆虛公可任請手救邀與俱還文安之入朝起恆讓爲首輔桂林破從王奔南寧先是孫可望據雲南遣使乞封王天麟議許之起恆持不可後胡執恭矯詔封爲秦王可望知其僞遣使求真封起恆又持不可可望大怒至是知王播遷遣其將賀九儀張勝等率勁卒五千迎王至南寧直上起恆舟怒曰攘臂問王封是秦非秦起恆曰君

遠迎王上功甚偉朝廷當有隆恩若專問此事是挾封非迎王上也九儀怒格殺之投屍於江遂殺給事中劉堯珍吳霖張載述追殺兵部尚書楊鼎和於崑崙關皆以阻封議故時順治八年二月也起恆旣死屍流十餘里泊沙渚聞虎負之登崖葬於山麓九儀等聞驚悸累日

朱天麟字游初崑山人舉崇禎元年進士授饒州推官屢攝屬邑事皆有惠政考選入都貧不能行賂擬授部曹帝御經筵講官竝爲稱屈及臨軒親試乃改翰林編修十七年正月奉命祭淮王抵山東而京師陷及南都破走福州唐王擢少詹事署國子監事天麟見鄭芝龍跋扈乞假至廣東聞汀州變又走廣西入安平土州

順治四年永明王居武岡以禮部右侍郎召天麟疏請王自將爲先鋒倡率諸鎮毋坐失事機辭不至明年王在南寧擢禮部尚書尋拜東閣大學士天麟請親率士兵略江右不聽乃趨謁王會李成棟反

大清從王至潯州而潯帥陳邦傳請世居廣西如黔國公故事天麟執不允邦傳怒以慶國公印尚方劍擲天麟舟中要必得仍執不允已而成棟奉王駐肇慶天麟謂機可乘復勸王亟頒親征詔規取中原王優詔荅之不能行也當是時朝臣各樹黨從成棟至者曹曩耿獻忠洪天擢潘曾緯毛毓祥李綺自誇反正功氣陵朝士從廣西扈行至者天麟及嚴起恆王化澄晏清吳貞毓吳其雷洪士彭雷得復尹三聘許兆

進張孝起自恃舊臣詆曹耿等嘗事異姓久之復分吳楚兩黨王吳者天麟孝起貞毓李用楫及堵肩錫王化澄萬勦程源郭之奇皆內結馬吉翔外結陳邦傳主楚者袁彭年丁時魁蒙正發劉湘客金堡皆外結瞿式耜內結李元胤元胤者惠國公成棟子爲錦衣指揮使進封南陽伯握大權彭年等倚爲腹心勢張甚彭年嘗論事王前語不遜王責以君臣之義彭年勃然曰倘向者惠國以五千鐵騎鼓行而西君臣義安在王變色大惡之彭年等謀攻去吉翔邦傳權可獨擅也而堡甫居言路有鋒氣乃疏陳八事劾慶國公邦傳十可斬文安侯吉翔司禮中官龐天壽大學士起恆化澄與焉起恆化澄乞去天麟奏雷之堡與給事中時魁等復相繼劾起恆

吉翔天壽無已太妃召天麟面論武岡危難賴吉翔左右令擬論嚴責堡等天麟爲兩解卒未嘗罪言者而彭年輩怒不止王知羣臣水火甚令盟於太廟然黨益固不能解明年春邦傳訐堡官臨清嘗降流賊受其職且請堡爲已監軍天麟因擬論譏堡堡大憤時魁乃鼓言官十六人詣閣詆天麟至登殿陛大譁棄官擲印而出王方坐後殿與侍臣論事大驚兩手交戰茶傾於衣急取還天麟所擬而罷天麟遂辭位王慰畱再三不可陛辭叩頭泣王亦泣曰卿去余益孤矣初時魁等謂所擬出起恆意欲入署毆之是日起恆不入而天麟獨自承遂移怒天麟逐之去并逐其弟爲行人兩子爲御史中書舍人者天麟移居慶遠王化澄貪鄙無物望亦爲時魁

等所攻碎冠服辭去王乃召何吾騶黃士俊入輔未幾吾騶亦爲堡等排去獨士俊起恆在乃復召天麟天麟不至拜疏言今國勢累卵路人皆知而建言者絕不問瑣屑一人一事掉頭以爭曰我古遺直也今而後請勿以四方無利害者執爲極重大事而獨使主上憂社稷其意復爲堡等發也堡等既連逐諸臣益橫而堡尤負彊直聲堵肩錫自湖南入朝堡劾其喪師棄地孫可望遣使乞封王堡七疏爭又面責肩錫昵李赤心與可望所遣使肩錫爲氣懾胡執恭擅封可望爲秦王堡請斬執恭以正國法又連劾兵部侍郎萬翱程源禮部侍郎郭之奇戶部尙書吳貞毓貞毓等欲排去之畏元肩爲援不敢發七年春王赴梧州元肩畱肇慶陳邦傳適遣兵

入衛貞毓之奇翺源乃合諸給事御史劾彭年湘客時魁堡正發把持朝政罔上行私罪王爲彭年反正有功免議下堡等獄堡又以語觸忌與時魁竝謫戍湘客正發贖配追賊王乃再召天麟天麟疏言年來百爾構爭盡壞實事昔宋高宗航海猶有退步今則何地可退當奮然自將文武諸臣盡擐甲胄臣亦抽峒丁擇土豪募水手經略嶺北湖南爲六軍倡若徒責票擬以爲主持政本今政本安在乎時大兵日逼王不能從召天麟入直進官而已未幾廣州桂林皆失王奔南寧明年

大兵益逼孫可望請王赴雲南初起恆持可望封天麟及王化澄獨謂宜許及可望使至天麟力請從之諸臣以起恆被殺故皆不可天麟乃奉命經略左右兩江土司以爲勤王之助兵未集

大兵逼南寧王倉皇出走天麟扶病從之明年四月抵廣南王已先駐安龍天麟病劇不能入覲卒於西坂村

張孝起吳江人舉於鄉爲廉州推官

大兵至避海濱尋舉兵謀恢復戰敗被獲妻妾俱投海死孝起羈軍中會李成棟叛

大清孝起乃脫去永明王以爲吏科給事中清真介直不與流俗伍王至梧州劉湘客丁時魁金堡蒙正發以失李元胤援竝辭職王報許以孝起代時魁掌吏科印俄與廷臣共排去湘客等遂爲其黨所疾高必正湘客鄉人也尤疾之怒罵

於朝王爲解乃已久之擢孝起右僉都御史巡撫高雷廉瓊四府城破走避龍門島島破被執不食七日死

吳貞毓字元聲宜興人崇禎十六年進士唐王時爲吏部文選主事後預立永明王進郎中王駐全州加太常少卿仍掌選事已擢吏部右侍郎從至肇慶拜戶部尚書廣東西會城先後失王徙潯州再徙南寧貞毓竝從貞毓與嚴起恆共阻孫可望秦王封可望殺起恆貞毓以奉使獲免及還進東閣大學士代起恆可望自雲南遷貴陽議移王自近挾以作威其將掌塘報者曹延生甚貞毓言不可移黔時

順治八年大兵南征勢日迫王召諸臣共議有請走海濱就李元肩者有議入安南避難者有議泛海抵閩依鄭成功者

惟馬吉翔龐天壽結可望堅王赴黔貞毓因前阻封議且入延生言不敢決元肩疏請出海王不欲就可望而以海濱遠再下廷議終不決何開國公趙印選衛國公胡一青殿後軍戰敗奔還請王速行急由水道走土司抵瀨湍二將報大兵益近相距止百里上下失色皆散去已次羅江土司追騎相距止一舍會日晡引去乃稍安次龍英抵廣南歲已暮可望遣兵以明年二月迎王入安隆所改爲安龍府奉王居之宮室庠陋服御粗惡守護將亦罕盡人臣禮王不堪其憂吉翔掌戎政天壽督勇衛營諂事可望惡貞毓不附已令其黨冷孟鉏吳象元方祚亨交章彈擊且語孟鉏等曰秦王宰天下我具啟以內外事盡付戎政勇衛二司大權歸我公等

爲羽儀貞毓何能爲吉翔遂遣門生郭璘說主事胡士瑞擁戴秦王士瑞怒厲聲叱退之他日吉翔遣璘求郎中古其品畫堯舜禪受圖以獻可望其品拒不從吉翔譖於可望杖殺其品而可望果以朝事盡委吉翔天壽於是士瑞與給事中徐極員外郎林青陽蔡縝主事張鐫連章發其奸謀王大怒兩人求救於太妃乃免前御史任候中書方于宣勸可望設內閣九卿科道官改印文爲八疊盡易其舊立太廟定朝儀擬改國號曰後明王聞憂懼密謂中官張福祿全爲國曰聞晉王李定國已定廣西軍聲大振欲密下一敕令統兵入衛若等能密圖乎二人言徐極林青陽張鐫蔡縝胡士瑞曾疏劾吉翔天壽宜可與謀王卽令告之五人許諾引以告貞毓

貞毓曰王上憂危正我輩報國之秋諸君中誰能充此使者青陽請行乃令佯乞假歸葬而使員外郎蔣乾昌撰予定國敕主事朱東旦書之福祿等持入用寶青陽於歲盡間道馳至定國所定國接敕感泣許以迎王明年夏青陽久未還王將擇使往促貞毓以翰林孔目周官對都督鄭允元曰吉翔晨夕在側假他事出之外庶有濟王乃令吉翔奉使祭先王及王太妃陵於梧州南寧而遣周官詣定國吉翔在道微知青陽密敕事遣人至定國營偵之主事劉議新者道遇吉翔意其必預謀也告以兩使齎敕狀吉翔驚駭啟報可望可望大怒并疑吉翔預謀遣其將鄭國赴南寧逮之會鐫士瑞及李元開以王親試極縝東旦及御史林鍾以久次皆予美官

天壽及吉翔弟都督雄飛忌甚與其黨郭璘方謀陷之而鍾
續極鑄士瑞亦知事洩倉皇劾吉翔天壽表裏爲奸王見事
急卽下廷臣議罪天壽懼與雄飛馳貴陽告可望初青陽還
至南寧爲守將常榮所留密遣親信劉吉告之王王喜改青
陽給事中諭貞毓再撰敕鑄屏翰親臣金印令吉還付青陽
至廉州周官與青陽遇偕至高州賜定國定國拜受命而是
時鄭國已械吉翔至安龍與諸臣面質貞毓謝不知國怒因
挾貞毓直入王所居文華殿迫脅王索主謀者王懼不敢正
言謂必外人假敕寶爲之國遂努目出與天壽至朝房械貞
毓并允元鍾續乾昌元開極鑄士瑞東旦及太僕少卿趙賡
禹御史周允吉朱議屨員外郎任斗墟主事易士佳繫私室

又入宮擒福祿爲國而出其黨冷孟鉉蒲纓宋德亮朱企鋸
等迫王速具主名王悲憤而退翊日國等嚴刑拷掠獨貞毓
以大臣免衆不勝楚大呼二祖列宗且大罵時日已暮風雷
忽震烈續厲聲曰今日續等直承此獄稍見臣子報國苦衷
由是衆皆自承國又問曰主上知否續大聲曰未經奏明乃
復收繫以欺君悞國盜寶矯詔爲罪報可望可望請王親裁
王不勝憤下廷議吏部侍郎張佐辰及纓德亮孟鉉企鋸蔣
御曦等謂國曰此輩盡當處死倘留一人將爲後患於是御
曦執筆佐辰擬旨以鑄福祿爲國爲首罪凌遲餘爲從罪斬
王以貞毓大臣言於可望罪絞吉翔以福祿等內侍謂王妃
知情將廢之令主事蕭尹歷陳古廢后事妃泣訴於王乃已

諸人就刑神色不變各賦詩大罵而死其家人合瘞於安龍北關之馬場已而青陽逮至亦被殺獨官走免時

順治十一年三月也居二載定國竟奉前敕護王入雲南乃贈貞毓少師太子太師吏部尙書中極殿大學士賜祭諡文忠廕子錦衣世千戶餘贈恤有差已建廟於馬場勒碑大書十八先生成仁處以旌其忠定國旣奉王居滇卽捕吉翔及其家人令步將靳統武收繫將殺之吉翔日媚統武定國客詣統武吉翔復媚之因相與譽吉翔於定國而微爲辨冤定國召吉翔入謁卽叩頭言王再造功千古無兩吉翔幸望見顏色死且不朽他是非何足辨也定國乃大喜吉翔因日諂定國客令說定國薦已入內閣遂與定國客蟠結盡握中外

權天壽亦復用事後從王入緬甸天壽先死吉翔爲緬人所殺

文安之夷陵人天啓二年進士授庶吉士進檢討改南京司業崇禎中歷南京祭酒爲薛國觀所構削籍歸久之言官交薦未及召而京師陷福王時起爲詹事唐王復召拜禮部尙書安之方轉側兵戈間皆不赴永明王以瞿式耜薦與王錫袞並拜東閣大學士亦不赴

順治七年六月安之謁王梧州時嚴起恆爲首輔王化澄朱天麟次之起恆讓安之爲首輔處其下孫可望再遣使乞封秦王安之持不予其後桂林破王奔至南寧

大兵日迫而雲南又爲可望所據不可往安之念川中諸鎮

兵尙強欲結之共獎王室乃自請督師加諸鎮封爵王從之
加太子太保兼吏兵二部尙書總督川湖諸處軍務賜劍便
宜從事進諸將王光興郝永忠劉體仁袁宗第李來亨王友
進塔天寶馬雲翔郝珍李復榮譚弘譚詣譚文党守素等公
侯爵卽令安之齋敕印行可望聞而惡之并銜前阻封議遣
兵伺於都勻邀止安之追奪光興等敕印留數月乃令入湖
廣安之遠客他鄉無所歸復赴貴州將謁王於安龍可望坐
以罪戍之畢節衛先是可望欲設六部翰林等官慮人議其
僭乃以范鑛馬兆義任俱萬年策爲吏戶禮兵尙書竝加行
營之號後又以程源代年策而俱最寵與方于宣屢勸進可
望令待王入黔議之王久駐安龍可望遂自設內閣六部等

官以安之爲東閣大學士安之不爲用久之走川東依劉體
仁等以居李赤心高必正等久竄處廣西賓橫南寧間赤心
死養子來亨代領其衆推必正爲主已而必正亦死其衆食
盡且畏

大兵逼率衆走川東分據川湖間耕田自給川中舊將王光
興譚弘等附之衆猶數十萬

順治十六年正月王奔永昌安之率體仁宗第來亨等十六
營由水道襲重慶會譚弘譚詣殺譚文諸將不服安之欲討
二人二人懼率所部降於

大兵諸鎮遂散時王已入緬甸地盡亾安之不久鬱鬱而卒
楊畏知者竇雞人崇禎中歷官雲南副使分巡金滄乙酉秋

武定士官吾必奎反連陷祿豐廣通諸縣及楚雄府畏知督兵復楚雄駐其地必奎伏誅而阿迷士官沙定洲繼亂據雲南黔國公沐天波走楚雄巡撫吳兆元不能制許爲奏請鎮雲南定洲遂西追天波畏知說天波走永昌而已以楚雄當定洲定洲至畏知語之曰若所急者黔國爾今已西待若定永昌還朝命當已下予出城以禮見今順逆未分不能爲不義屈也定洲恐失天波與盟而去分兵陷大理蒙化畏知乘間清野繕堞徵鄰境援兵姚安景東俱響應定洲聞不敢至永昌還攻楚雄不能下畏知伺賊懈輒出擊殺傷多乃引去還攻石屏寧州嶠峨皆陷之復西攻楚雄迄不能下明年孫可望等入雲南定洲還救大敗遁歸阿迷可望等遂據會城

初唐王聞畏知抗賊進授右僉都御史巡撫雲南以巡撫吳兆元爲總督及可望等至以畏知同鄉甚重之尋與劉文秀西略畏知拒戰敗投水不死踞而罵可望下馬慰之曰聞公名久吾爲討賊來公能共事相與匡扶明室非有他也畏知瞪目視之曰給我爾可望曰不信當折矢誓畏知曰果爾當從我三事一不得仍用僞西年號二不得殺人三不得焚廬舍淫婦女可望皆許諾乃與至楚雄略定大理諸郡使文秀至永昌迎天波歸迤西八府免屠戮畏知力也時永明王已稱號於肇慶而詔令不至前御史臨安任僎議尊可望爲國主以于支紀年鑄典朝通寶錢畏知憤甚有所忤輒抵掌謾罵可望數欲殺之李定國劉文秀爲保護得免可望與劉李

同輩一旦自尊兩人不爲下聞肇慶有君李錦李成棟等竝
加封爵念得朝命加王封庶可相制乃議遣使奉表畏知亦
素以尊主爲言歲己丑遣畏知及永昌故兵部郎中龔彝赴
肇慶進可望表請王封爲金堡等所持畏知乃曰可望欲權
出劉李上爾今晉之上公而卑劉李侯爵可也乃議封可望
景國公賜名朝宗定國文秀皆列侯遣大理卿趙昱爲使加
畏知兵部尚書彝兵部侍郎同行時堵胤錫曾賜空敕得便
宜行事昱乃就與謀矯命改封可望平遠王易敕書以往武
康伯胡執恭者慶國公陳邦傳中軍也守泗城州與雲南接
欲自結可望言於邦傳先矯命封可望秦王曰藉其力可制
李赤心也邦傳乃鑄金章曰秦王之寶璠所給空敕令執恭

齋行可望大喜郊迎亾何畏知等至可望駭不受曰我已封
秦王矣畏知曰此僞也執恭亦曰彼亦僞也所封實景國公
敕印故在可望怒辭敕使下畏知及執恭獄而遣使至梧州
問故廷臣始知矯詔事文安侯吉翔請封可望潯江王使
者言非秦不敢復命大學士嚴起恆持不可兵部侍郎楊鼎
和助之且請却所獻白金玉帶會鄖國公高必正等入朝召
使者言本朝無異姓封王例我破京師逼死先帝滔天大罪
蒙恩宥赦亦止公爵爾張氏竊據一隅罪固滅等封上公足
矣安敢冀王爵自今當與我同心報國洗去賊名毋欺朝廷
孱弱我兩家士馬足相當也又致書可望詞義嚴正使者唯
唯退議遂寢必正者李自成妻弟同陷京師者也可望不得

封益怒其年九月親率兵至貴州十一月
大兵破廣州桂林王走南寧事急遣編修劉蔭封可望冀王
可望仍不受畏知曰秦冀等爾假何如真可望不聽定國等
勸可望遣畏知終其事可望許之明年二月先遣部將賀九
儀張勝張明志赴南寧索沮秦封者起恆鼎和及給事中劉
堯珍吳霖張載述殺之乃真封可望秦王而畏知旋至痛哭
自劾語多侵可望遂留爲東閣大學士與吳貞毓同輔政可
望聞之怒使人召至貴陽面責數之畏知大憤除頭上冠擊
可望遂被殺楚雄人以畏知守城功爲立祠以祀
王錫袞祿豐人天啟二年進士改庶吉士授檢討崇禎中累
官少詹事十三年擢禮部右侍郎明年秋尙書林欲楫出視

孝陵錫袞以左侍郎掌部事請祀吳與弼羅倫章懋呂柟蔡
清陳直晟王良羅洪先鄒守益羅欽順顧憲成於學宮不果
帝禁內臣干預外政敕禮官稽先朝典制以聞錫袞等備列
諸監局職掌而不及東廠提督內臣王德化言東廠之設始
永樂十八年國朝典彙可據禮官覆議不及請解臣職停廠
不設錫袞等言典彙雖載此條但係下文箋註不見正史會
典則據成化十二年閣臣萬安奏東廠之設自文皇迄今五
十六年因而採入臣等以正史無文故不敢妄引帝不聽錫
袞復抗疏請罷廠亦不允二月帝再耕藉田錫袞因言頻歲
旱蝗三餉疊派請量除加徵嚴核蠹餉俾農夫樂生又以時
方急才請召還故侍郎陳子壯顧錫疇故祭酒倪元璐文安

之且乞免黃道周永成帝納真人張應京言加尊天地水三官為大帝應京又請論中外一體尊奉慶賀錫衮言三官號不經且邇來游惰奸民多竄入白蓮無為諸教所在充塞若許慶賀害不可勝言并請斥逐應京用清輦轂不納給事中沈肩培請增天下解額錫衮因言南畿浙江人文更盛宜倍增又言舉人不第有三十年不謁選者宜定制數科不售即令服官從之欲楫還朝錫衮調吏部尚書李日宣下獄遂掌部事帝頗信佛教恆蔬食錫衮疏諫帝嘉其寓愛於規進秩一等疏劾河南巡按嚴雲京運籌無效請以監軍御史王漢代之報可尋尚書鄭三俊至乃解部務直講筵十六年憂歸唐王立拜禮部尚書兼東閣大學士永明王立申前命皆不

至上曾沙定洲作亂執至會城詭草錫衮疏上永明王言定洲忠勇請代黔國公鎮雲南疏既行以藁示之錫衮大恨愬上帝祈死居數日幽憤卒

高勣字無功紹興人事永明王歷官光祿少卿馬吉翔龐天壽搆殺吳貞毓等李定國奉王至雲南捕吉翔欲殺之已為其所諛復薦吉翔入閣盡握中外權而天壽亦用事定國與劉文秀時詣二人家定國時封晉王文秀蜀王也勣與御史鄔昌期患之合疏言二王功高望重不當往來權佞之門恐滋奸弊復蹈秦王故轍疏上二王遂不入朝吉翔激王怒命各杖一百五十除名定國客金維新走告定國曰勣等誠有罪但不可有殺諫官名定國即偕文秀入救乃復官及定國

敗孫可望兵自以爲無他患武備盡弛勅與郎官金簡進諫曰今內難雖除外憂方大伺我者頓刃待兩虎之斃而我酣歌漏舟之中熟寢燕薪之上能旦夕安邪二王老於兵事胡泄泄如此定國愬之王前頗激王擬杖二臣以解之朝士多爭不可移時未能決而三路敗書至定國始逡巡引謝二臣獲免簡字萬藏勸鄉人後王入緬甸二人扈行竝死之有李如月者東莞人官御史王駐安龍時孫可望獲叛將陳邦傳父子去其皮傳屍至安龍如月劾可望不請旨擅殺勸鎮罪同莽操而請加邦傳惡諡以懲不忠王知可望必怒留其疏召如月入諭以諡本褒忠無惡諡理小臣妄言亂制杖四十除名意將解可望而可望大怒遣人至王所執如月至朝門

外抑使跪如月憤甚向闕叩頭大呼太祖高皇帝極口大罵其人遂剔其皮斷手足及首實草皮內紉之懸於通衢又有任國璽者官行人

順治十五年永明王將出奔國璽獨請死守章下廷議李定國等言行人議是但前途尙寬今暫移蹕捲土重來再圖恢復未晚也乃扈王入緬甸緬俗以中秋日大會羣蠻令黔國公沐天波偕諸酋椎髻跣足用臣禮見天波不得已從之歸泣告衆曰我所以屈辱者懼驚憂王上耳否則彼將無狀我罪益大國璽與禮部侍郎楊在抗疏劾之時龐天壽已死李國泰代掌司禮監印吉翔復與表裏爲奸國璽集宋末大臣賢好事爲一書進之王吉翔深恨之王覽止一日國泰即竊


去國璽尋進御史疏論時事三不可解中言禍急燃眉當思出險吉翔不悅卽令國璽獻出險策國璽忿然曰時事至此猶抑言官使不言邪時緬酋弟弒兄自立欲盡殺文武諸臣遣人來言曰蠻俗貴詛盟請與天朝諸公飲咒水吉翔國泰邀諸臣盡往至則以兵圍之令諸臣以次出外出輒殺之凡殺四十二人國璽及在天波吉翔國泰華亭侯王維恭綏寧伯蒲縵都督馬雄飛吏部侍郎鄧士廉等皆預焉惟都督同知鄧凱以傷足不行獲免時

順治十八年七月也自是王左右無人至冬十二月緬人遂送之出境事具 國史初王之出走緬甸也昆明諸生薛大觀歎息曰不能背城戰君臣同死社稷顧欲走蠻邦以苟活

不重可羞邪顧子之翰曰吾不惜七尺軀爲天下明大義汝其勉之之翰曰大人死忠兒當死孝大觀曰汝有母在時其母適在旁顧之翰妻曰彼父子能死忠孝吾兩人獨不能死節義邪其侍女方抱幼子問曰主人皆死何以處我大觀曰爾能死甚善於是五人偕赴城北黑龍潭死次日諸屍相牽浮水上幼子在侍女懷中兩手堅抱如故大觀次女已適人避兵山中相去數十里亦同日起火死有那嵩者沅江土官也世爲知府嵩嗣職循法無過王走緬甸過沅江嵩與子燾迎謁供奉甚謹設宴皆用金銀器宴畢悉以獻曰此行上供者少聊以佐缺乏耳後李定國號召諸土司兵嵩卽起兵應之已而城破登樓自焚闔家皆死其土民亦都巷戰死

明史彙

列傳一百五十六終



實政堂

